

四庫全書

史部

欽定四庫全書

史部

蜀中廣記卷二

詳校官編修

臣翟

槐

編修

臣

程嘉謨覆勘

總校官庶吉士

臣何思鈞

校對官學正

臣陳木

謄錄舉人

臣羅允文

欽定四庫全書

史部十一

蜀中廣記

地理類八雜記之屬

提要

臣等謹按蜀中廣記一百八卷明曾學佺撰  
學佺有易經通論已著錄學佺嘗官四川右  
叅政遷按察使是書蓋成於其時目凡十二  
曰名勝曰邊防曰通釋曰人物曰方物曰仙  
曰釋曰游宦曰風俗曰著作曰詩話曰畫苑

蒐採宏富頗不愧廣記之名其中如叙州府之高州明史地理志云洪武五年由州改縣正德十三年復為州珙及筠連三縣隸焉此書仍稱高州為縣二縣亦不為之屬又成都府之資陽縣明史地理志屬簡州此書不繫簡州而別於仁壽并研二縣後皆未免編次偶疎王士禎古夫于亭雜錄曰丹鉛錄載東坡贈青神楊棟詞云允文事業從容了要岷



峨人物後先相照見說君王曾有問似此人  
才多少而引小說高宗問馬騏蜀中人才如  
允文者有幾云云按允文采石之功在南渡  
後東坡之歿久矣安得先有此詞而曾能始  
蜀中十志亦載之畧無駁正又曰蜀中十志  
以物類相感志十八卷為東坡撰謬甚則舛  
訛牴牾亦時時出蓋援據既博則精粗畢  
括同異魚陳亦事勢之所必至要之不害其

大體談蜀中掌故者終以全蜀藝文志及是書為取材之淵藪也乾隆四十三年六月恭校上

總纂官

臣

紀昀

臣

陸錫熊

臣

孫士毅

總校官

臣

陸費

墀

欽定四庫全書

蜀中廣記卷一

明 曹學佺 撰

名勝記第一

川西道

成都府

一 成都華陽二縣附郭

華陽國志蜀之為國肇於人皇與巴同園至黃帝為其子昌意娶蜀山氏之女生子高陽是為帝嚳封其支庶

於蜀世為侯伯歷夏商周武王伐紂蜀人與焉尚書牧  
誓庸蜀羌髳是也有周之世限以秦巴雖奉王職不得  
與春秋盟會君長莫同書軌周失綱紀蜀先稱王有蜀  
侯蠶叢其目縱始稱王次王曰柏灌次王曰魚鳧又次  
後有王曰杜宇始稱帝號曰望帝更名蒲卑治郫邑或  
治瞿上後傳位于其相開明開明位號曰叢帝叢帝生  
盧帝盧帝生保子帝九世始傳開明尚焉開明尚自夢  
郭移乃徙治成都揚雄蜀本紀云蜀王據有巴蜀之地

本治廣都樊鄉徙居成都者也。已與蜀讐求救于秦。秦惠王二十七年遣張儀與司馬錯等滅蜀。遂置蜀郡。儀築成都以象咸陽。修整里閭。市張列肆。規制廣備。故左思蜀都賦云。金城石郭。兼匝中區。既麗且崇。實號成都矣。其地東接于巴。南接于越。北接于秦。西奄峨嵋。地稱天府。原曰。華陽漢武帝元朔二年。以新啟犍為。牂柯。越嶲三郡。疆壤益廣。始稱益州。初治廣漢之雒縣。後乃徙此。李固與弟固書曰。固今年五十七。鬢髮已白。所謂容

身而遊滿腹而去周觀天下獨未見益州耳昔嚴夫子  
常言經有五涉其四州有九遊其八欲類此子矣王莽  
篡盜改天下郡守為率正又改蜀郡為導江遷公孫述  
為導江率正治臨邛後據成都稱帝具置百官造十層  
赤樓東觀漢記曰公孫述造十層赤樓也于是改益州  
為司隸蜀郡為成都尹矣建武光復二百餘載迄于孝  
靈王室多故劉焉求益州牧以避世難始治綿竹後徙  
成都先主代劉璋而有之即位于武擔之南典畧曰玄

德于是起館舍築亭障從成都至白水關四百餘區也  
後主建興二年以丞相亮開府領益州牧亮卒拜尚書  
令蔣琬為大將軍領益州刺史蜀亡晉太康初乃屬王  
國號曰成都內史永嘉之難沒于夷獠成都記云府治  
北三里許有李特所築赤塗城十六國春秋曰李雄定  
成都以嚴檉為蜀郡太守及即位遷檉益州刺史是矣  
桓溫西伐李勢出降劉義慶世說云宣武平蜀集叅僚  
置酒于李勢殿巴蜀縉紳莫不來萃桓既素有雄情爽

氣加爾日音調英發叙古今成敗由人存亡繫才其狀  
磊落一坐歎賞焉永和之際周撫為蜀郡太守四十餘  
年境土粗安王逸少與周益州書云省足下別疏具彼  
土山川諸奇揚雄蜀都左太冲三都殊為不備悉彼故  
為多奇益令其遊目意足也可得果當告卿求迎少人  
足耳至時示意遲此期真以日為歲但言此心已馳于  
彼矣又云吾有七兒惟一小者未婚過此便得至彼得  
果此緣一段奇事也梁武陵王始封入蜀元帝與之書



云蜀中斗絕易動難安弟可鎮之吾自當滅賊又別紙云地擬孫劉各安境界情深魯衛書信常通良所託重也蕭紀反戈東下以地降于西魏再折入周至隋開皇始定之封其子秀作鎮于茲營修宮室成都記曰隋蜀王秀嘗造一殿飛鳥不止其上此其凡耳後竟被徵唐初開國太宗以秦王建益州臺遙領之而已貞觀十年分成都縣之東偏置蜀縣在郭下明皇西幸駐蹕成都始改蜀縣為華陽而成都華陽二縣從此分矣 按今

成華二縣與蜀師護衛尺籍繡錯不能細為分析大較  
西門者屬成都東門者屬華陽而南北門則成都有三  
分之二華陽居其一焉予觀揚子雲答劉子駿書有少  
時所作成都城四隅銘則今之東西南北四門頗為近  
古西門者古之宣明門也南門者古之江橋門也東門  
者古陽城門北門者古咸陽門也李膺益州記云最東  
曰陽城門次西曰宣明門蜀時張儀樓即宣明門樓也  
重閣複道跨陽城門故太冲賦云結陽城之延閣飛觀

榭乎雲中矣江橋者大江水所經也稍西為市橋曰市  
橋門以漢舊州市在此橋南橋下即石犀所潛淵亦曰  
石牛門故曰少城南面有三門焉咸陽門者秦惠王二  
十五年蜀侯惲賜死封其子綰為蜀侯初蜀人葬惲郭  
外綰聞惲無罪乃使使迎喪入葬之郭內喪車至城北  
門忽陷入地中蜀人因名北門曰咸陽門矣 成都縣  
本治赤里街秦守張若徙入少城內少城者子城也惟  
西南北三壁東即大城之西墉故蜀都賦云亞以少城

接于其西矣周地圖記云初張儀築城城屢壞不能立  
忽有大龜出于江周行旋走巫言依龜行處築之城乃  
得立所掘處成大池龜乃伏于中龜每出則州境有賊  
刺史或病即此城也漢元鼎二年大城立九門少城立  
九門故有十八郭之稱而郡縣多城觀矣 太城者今  
南門城也李石詩序云張儀司馬錯所築太城自秦惠  
公乙巳歲至紹興壬午一千四百七十八年雖頽圯所  
存如斷壁峭立亦學舍一奇觀云學舍在南則太城可

知矣 少城者西南之間今之錦江樓也古今集記錦樓在龜城上前臨大江下瞰井邑西眺雪嶺東望長松白敏中嘗賦詩于其上舊記謂路巖所建非也巖在敏中之後矣范成大詩註云少城張儀所築子城也土甚堅橫木皆朽有穿眼土相着不解散予按王右軍法帖往在都見諸葛顓曾見問蜀中事云成都城門屋樓觀皆是秦時司馬錯所修令人遠想慨然具示為廣異聞華陽國志張儀張若城成都周迴十二里高七丈造

作下倉上皆有屋而置樓觀射圃又營廣府舍置鹽鐵市官并長丞皆與咸陽同制更于夷里橋南立錦官錦官者猶合浦之有珠官也西又有車官城其城東西南北皆有軍營壘城焉按此皆從西南隅論耳蜀漢昭烈即位于武擔之南當在城之正中今蜀藩是也隋之摩訶池偽蜀之宣華苑皆在其內昔諸葛武侯以丞相開府領益州牧故晉益州刺史治太城其制因之亦唐節度使宋制置使所稱建牙交戟地矣蜀太守治少城故

昔之郡治因焉西門直街鼓樓即宋銅壺閣也陸游記  
云閣南直西川門西北距府五十步乃蔣堂知益州伐  
江瀆廟材所創吳棫范成大相繼而侈張之為成都巨  
觀書於史又吳師孟修西樓記云西樓直府寢之北每  
春月花時大帥置酒高會叅佐於其下五日復縱民遊  
觀宴嬉西園以為歲事然止得造其廡序而已合此二  
說則府治為西門無疑相沿蜀郡太守之故址也今乃  
益遜而北蓋不敢與藩邸抗于是斥北城之地以居故

武擔山昔在城外而今在城內陸務觀有游武擔村落詩可証矣轉運使今之藩司也鈐轄使今之閫司也運司昔在城東有玉溪堂即偽蜀權臣故宅今藩司在城北閫司相沿如故若提刑漕使即今之守巡使者散在諸路是其職居位置皆有不同如此南門之勝如石室石犀嚴真觀江瀆池七星橋昭烈武侯祠其最著者華陽國志云始文翁立文學精舍講堂作石室一作玉室在城南永初後堂遇火太守陳留高朕更修立又



增造二石室李知幾云西為文翁稍南為高朕此文翁  
石室差大皆有石像矣樂史寰宇記云文翁學堂一名  
周公禮殿方輿勝覽云前代以周公為先聖至唐貞觀  
始從房玄齡等議更祀孔子開元冊謚文宣王位南嚮  
自是號文宣王殿矣而周公之祀遂廢然舊像猶存帥  
袁說友乃為殿祀之按上南志以武侯征西南夷而夢  
見周公故勅所在祀周公也任豫益州記云禮殿其櫺  
櫺節制猶古建南基高六尺厦屋三間通皆圖畫古人

之像及禮器瑞物堂西有二石室繫年錄云紹興六年  
成都教授范仲文奏疏言本府學殿建于東漢之初平  
漢人以大隸記其修築歲月刻于東楹至今九百四十  
三年蓋天下棟宇之古無過于此者按歐陽修集古錄  
以周公禮殿記蔡邕所書也范鎮云其柱鍾會隸書刻  
其上李知幾十詠詩說會與鄧艾同入蜀在咸熙元年  
甲申距漢獻興平元年甲戌凡七十一年矣會蓋追丈  
翁高君之美而書也趙明誠金石錄跋云右漢周公禮

殿記者今成都府學有漢時所建舊屋柱皆正方上狹下濶此記刻在柱上靈帝初平五年立距今蓋千年矣而字畫完好可讀當時石刻在者往往磨滅此記託于庶楹乃與金石爭壽亦異矣記有云甲午年故府梓潼文君增造吏舍二百餘間按華陽國志有文參字子奇梓潼人平帝用為益州太守不從王莽公孫述光武嘉之疑此記所載即其人也蓋光武建武十年歲次甲午云唐盧照隣文翁講堂詩錦里淹中館岷山稷下亭

空梁無燕雀古壁有丹青槐落猶疑市苔深不辨銘良  
哉二千石江漢表遺靈岑參詩文公不可見空使蜀人  
傳講席何時散高臺豈復全豐碑文字滅冥漠不知年  
裴鉶詩文翁石室有儀刑庠序千秋播德馨古栢尚留  
今日翠高岷猶藹舊時青人心未肯拋羶蟻弟子依前  
學聚螢更歎淹江無限水爭流祇願到滄溟宋李石詩  
來為人所愛去為人所思君看文與高慈惠蜀之師至  
今室中像凜凜建立時知非伯有石定是桐鄉祠蜀人

愛二公遠與千載期宋京蜀事補亡詩君不見西漢文  
翁為蜀守蜀學不居齊魯後諸生競欲保翁名石室鐫  
磨貴難朽東漢高公又幾時為作石室還如茲至今二  
室堅且久文公高公名不衰喻汝礪謁文公堂詩綠荻  
負幽隱高槐泛輕涼各誇一時好披風互低昂詎知五  
月中微陰忽催黃我行魯侯宮獨謁文翁堂若人骨已  
朽道在斯不亡遂令蜀文章照耀日月傍世事俱腐臭  
斯文真久長靡頽能幾時蕭條弱墟荒富貴豈不好千

載同一傷三歎為何人撫已涕自滂 寰宇記云石室  
司馬相如教授于此從者數千人按秦宓引地里志文  
翁倡其教相如為之師漢家得士盛于其世矣金石錄  
云石室又有左右生題名碑或云江陽寧蜀遂寧晉原  
以晉志攷之江陽蜀漢置此郡寧蜀遂寧晉原皆是宣  
武平蜀後置范蜀公云西漢時諸生姓名文學祭酒典  
學從事各一人司儀主事各一人左生七十三人右生  
三十人可攷者僅百許人按集古錄謂為晉宋間碑矣

王象之輿地碑目云大周總管太學碑益州刺史齊國  
公宇文憲立益州州學廟堂頌唐神龍二年史燾撰益  
州館學廟堂記永徽元年賀公亮撰益州孔子廟堂碑  
開元中周灝撰唐明皇追謚孔子冊文宋太平興國五  
年府尹辛仲甫立石又云石室贊大厯十年維州刺史  
鄭藏休撰殿中侍御史李樞篆益州文宣王廟碣會昌  
五年裴儋撰趙明誠唐益州學館廟堂記跋云成都縣  
令顏有意書撰人題法曹陳玉文學太子詹事待詔弘

文館陵州長史而姓名殘缺不可辨集古錄直以為有意撰非也碑陰載當時官僚姓名後人題云此記賀公亮撰未知果否繫年錄云宋高宗皇帝御書大成殿榜紹興六年賜成都府學從教授范仲爰所請也成都記云偽蜀孟昶有國其相母昭裔刻孝經論語爾雅周易尚書周禮毛詩禮記儀禮左傳凡十經于石其書丹則張德釗楊鈞張紹文孫逢吉朋吉周德貞也石凡千數盡依太和舊本歷八年乃成公穀則有宋田元均時刻



古文尚書則晁公武所補也胡元質宗愈作堂以貯之  
名石經堂在府學按已上諸刻今皆不存所存者孔門  
七十二子像又近時摹宋本而刻者人物衣褶差有古  
意石經禮記數段流落在合州賓館中李陽冰篆書之  
碑陰予友范汭見而為予言之 石犀寺一名石牛寺

華陽國志周顯王之世蜀王有褒漢之地因獵谷中與  
秦惠王遇惠王以金二笥遺蜀王王報以珍玩之物物  
化為土惠王怒羣臣賀曰天奉我矣王將得蜀土地惠

王喜乃作石牛五頭朝瀉金其後曰牛使金有養卒百人蜀人悅之使使請石牛惠王許之乃遣五丁迎石牛既不使金怒遣還之乃嘲秦人曰東方牧犢兒秦人笑之曰吾雖牧犢當得蜀也輿地志云鄧艾廟南有石牛即秦惠王遺蜀王者水經註西南石牛門曰市橋吳漢入蜀自廣都令輕騎先往焚之橋下謂之石犀淵李冰昔作石犀五頭以厭水精穿石犀渠于南江命之曰犀牛里後轉犀牛二頭在府中一頭在市橋一頭沈之于

淵也今寺正殿階左有石蹲處狀若犀然額曰聖壽寺  
古之龍淵寺也迺晉王羽宅後捨為寺改名龍淵佛殿  
有水眼如井云與海通高僧傳晉惠持到蜀止金淵精  
舍是矣其後改名空慧隋賜蜀王秀竹園六十頃此地  
屬焉唐儀鳳二年勅天下七寺建塔立石柱二度僧嘗  
七百人此其一也會昌中廢至大中元年李回重建募  
萬里橋南元和聖壽寺額鑒此故曰聖壽寺字則僖宗  
御書也寺有尊勝呪石幢高七尺圍四尺太和馬季

武行書我明嘉靖中掘地得之 唐岑參石犀詩江水  
初蕩滿蜀人幾為魚向無爾石犀安得有邑居始知李  
太守伯禹亦不如杜甫石犀行君不見秦時蜀太守刻  
石立作三犀牛自古雖有厭勝法天生江水向東流蜀  
人矜誇一千載泛溢不近張儀樓今年灌口損戶口此  
事或恐為神羞終藉隄防出衆力高擁木石當清秋  
益州記曰鴈橋東有嚴君平卜處土臺高數丈祝穆方  
輿勝覽云龜城水中出金雁因謂之雁橋也錦里耆舊

傳曰嚴君平宅卜肆之井猶存今為嚴真觀道教靈驗  
記云成都卜肆支機石即海客攜來自天河所得織女  
令問嚴君平者也太尉燉煌公好奇尚異命工人鑄取  
支機一片欲為器用椎琢之際忽若風簷墜于石側如  
此者三公知其靈物乃已之至今所刻之迹在焉復令  
穿掘其下則風雷震驚咫尺昏瞠遂不敢犯唐張九齡  
送姚評事入蜀賦得卜肆詩云蜀嚴化已久沈冥空所  
思嘗聞賣卜處猶憶下簾時驅傳應經此懷賢儻問之

歸來說往事歷歷偶心期岑參卜肆詩君平曾賣卜卜  
肆蕪已久至今杖頭錢時時地上有不知支機石還在  
人間否鄭世翼君平古井詩嚴平本高尚遠蹈古人風  
賣卜成都市流名大漢中舊井改人世寒泉久不通年  
多既罷汲無禽乃遂空如何屬秋氣惟見落雙桐宋呂  
光弼詩卜肆垂簾地依然門徑開沈冥時已往思慕客  
猶來烏啄虛簷壞孤穿古井摧空餘舊機石歲歲長春  
苔喻汝礪游嚴真觀見壁上有記古鼎丹砂事因述以

詩云古木共幽意長廊亦肅如於焉步逍遙且復散衣  
裾塵慮颯已空道心頗閑舒不知度世人去此歲幾徂  
云何有丹砂尚爾留庭隅支機亦悠哉誰復訂有無我  
知此公意慨彼元鼎初繼之五鳳間斯民斃刀鋸聊欲  
謝世網歛以道自娛挹獨理自會曠懷遺所拘初匪逃  
世人而世自我疎含默念斯理起我憂患餘宋京補亡  
詩云君不見莊遵賣卜成都市市中仙隱無人值百錢  
度日復何求猶有沈冥見文字不因問着牛女星下世

安能知姓名雲中雞犬拔家去舊宅寂寞秋蕪平桴機  
石在年年長藥鼎空留閉黃壤前時發掘篆籀新明水  
神丹光滉漾金雁橋邊臺觀存神仙遺事渺難論安得  
先生為我卜俗骨庶可窺天關 括地志云江瀆祠在  
成都縣南上四里漢郊祀志云秦并天下立江水祠於  
蜀至今歲祀之按廣雅江神謂之竒相江記云帝女也卒  
為江神矣漢舊儀云祭四瀆用三牲圭沈有車馬紺蓋  
以夏之日觴焉按陸游江瀆廟碑云成都自唐有江瀆



廟其南臨江及後節度使高駢大城成都廟與江始隔  
馮浩設廳記云廟前臨清池有島嶼竹木之勝紅葉夏  
發水碧四照為一州之觀田況成都遨樂詩伏日宴江  
瀆祠避暑因遊江瀆池此會起于文潞公也宋初集江  
瀆池詩云五月追涼地滄江剩素漣林煙昏岸日樓影  
壓池天篠密工迷徑荷欹巧避船機忘更何事魚鳥亦  
留連又飛檻枕溪光歡言客徧觴暫雲銷樹影驟雨發  
荷香辛白橙蠶熟庖刀鱠縷長蘋風如有意盈社借浮

涼又溪淺容篙短舟移覺岸長烟稠芰荷葉霞熟荔支  
房枝疊三撾鼓杯寒十饋漿便成逃暑醉官事底相妨  
又九月十日宴江瀆亭詩節去歡猶在賓來賞更延悠  
揚非短日淒緊乍寒天霽沼元非漲秋花自少妍蟻留  
新獻耐蕙續不殘烟戲鯉衝餘藻游龜避折蓮流芳真  
可惜從此遂凋年 華陽國志云蜀江衆多作橋故蜀  
立里多以橋為名西南兩江有七橋直西門郛江中冲  
治橋西南石牛門曰市橋城南曰江橋南渡流曰萬里

橋西上曰夷里橋亦曰笮橋橋從冲治橋西出折曰長  
昇橋揚雄蜀記云星橋上應七星也李冰所造按七星  
橋者一長星橋今名萬里二員星橋今名安樂三玳星  
橋今名建昌四夷星橋今名笮橋五尾星橋今名禪尼  
六冲星橋今名永平七曲星橋今名昇仙此李膺所記  
矣今南門江洲中有金沙寺其處俗呼為七星灘也後  
漢書世祖謂吳漢曰安軍宜在七橋連星間按漢自廣  
都乘勝進逼成都與其副劉尚南北相望夾江為營浮

橋相對公孫述使謝豐揚軍市橋出漢後襲破漢墜馬  
落水緣馬尾得出入壁命將夜潛渡江就尚擊豐斬之  
於是水之陰焉今正南門外者乃江橋耳水經注云南  
江橋亦曰安樂橋在城南二十五步宋孝武以橋為安  
樂寺改名安樂橋十六國春秋李特將起童謡云江頭  
橋闕下李成都北門十八子即此橋也南上為萬里橋  
亦名篤泉橋橋之南有篤泉矣蜀使費禕聘吳丞相亮  
祖之歎曰萬里之行始於今日故曰萬里橋唐岑參萬

里橋詩成都與維揚相去萬里地滄江東流疾帆去如  
鳥翅楚客過此橋東看盡垂淚江都陸肱賦云萬里兮  
蜀郡隋都二橋分地角天隅東土為揚西邦曰益架長  
虹于兩地客思迢迢浩積水於千秋江流脉脉結構應  
似途程甚偏飾丹腹以雖同彼臨淮海度軒車而既易  
此對銅梁正用揚益相望事也 寰宇記云惠陵蜀先  
主陵也今有祠存號曰惠陵祠周地圖云先主祠在府  
西南八里惠陵東七十步齊高帝夢益州有天子鹵簿

詔刺史傳覃修立而規制卑小至唐相國李回在鎮更  
改置守陵戶四時祭祀岑參先主廟詩先主與武侯相  
逢雲雷際感通君臣分義激魚水契遺廟空蕭然英靈  
貫千歲張儼詩雄名垂竹帛荒陵壓阡陌終古更何聞  
悲風入松柏劉夢得詩天下英雄氣千秋尚凜然勢分  
三足鼎業復五銖錢得相能開國生兒不象賢淒涼蜀  
故妓來舞魏宮前宋晁迥詩天地收霸氣丘原餘閟宮  
野人相指似旁有若唐封當時大耳兒甚似隆準公夫

豈忘故都崎嶇已蜀中劃然成三分正爾扼兩雄武侯  
抱遺恨秦隴竟莫通獨憐晉昌明千載時始逢坐看五  
胡亂蕭條河洛空碑目云先主廟碑貞元四年蘇端撰  
又云昭烈廟有裴中立武侯碑柳公綽書今存又有段  
尹石為樵者斫斷陳薦作詩紀之又有臨淮公武元衡  
碑楊嗣復祠祭畢觀碑感舊有作寄楊汝士和焉按元  
和初元衡鎮蜀中立為節度推官汝士先亦曾作文昌掌管也  
酉陽雜俎成都有唐平南蠻碑開元十九年劍南節度

副大使張敬忠所立時南蠻大酋長樂浪州刺史楊盛  
顛為邊惠明皇遣內常侍高守信為南道招慰處置使  
以討之拔其九城此事新舊唐書及野史皆不載按碑  
目以此為蕭晉用撰在昭烈廟中矣 能改齋漫錄蜀  
先主祠在成都錦官門外西夾即武侯祠東夾即後主  
祠蔣公堂帥蜀以禪不能保有土宇因去之大慈寺有  
蜀後主王衍銅像程公堂繼帥毀以鑄鐘蜀語曰任是  
兩王難當二堂樂史云關張二公祠俱在惠陵左右宋



廬陵王立按今昭烈祠左右侍側者後主北地王諶諸葛丞相亮亮子瞻及關張兩侯俱合為一祠也蜀志國降之日北地王諶率其官屬哭于先主廟以妻子自焚是矣酉陽雜俎云近有羣盜發蜀先主墓入穴見兩人張燈對奕侍衛十餘盜驚懼拜謝一人顧曰爾飲乎乃各飲以一杯兼乞與玉腰帶數條命速出盜至外口已漆矣帶乃巨蛇也視其穴已如舊成都記云蜀先主祠旁有獠村其民皆剔髮事浮屠而畜妻子自如及李德

裕下令嚴禁乃肅如也 方輿勝覽云武侯廟在府西南二里今為乘煙觀孔明表云薄田十頃桑八百株即此地孔明初亡百姓遇節朔各私祭於道上李雄稱王始為廟於少城內桓溫平蜀夷少城獨存孔明廟後封武興王廟至今祠祀不絕寰宇記云諸葛亮相蜀築臺以集諸儒兼待四方賢士號曰讀書臺在章城門路西今為乘煙觀杜光庭錄異記云成都書臺坊武侯宅南乘煙觀內有古井井內有魚長六七寸往往游于井上

水必騰涌相傳其井有龍矣杜甫詩丞相祠堂何處尋  
錦官城外柏森森映階碧草自春色隔葉黃鸝空好音  
三顧頻煩天下計兩朝開濟老臣心出師未捷身先死  
長使英雄淚滿襟武少儀詩執簡焚香入廟門武侯神  
像儼如存因機定蜀延衰漢以計連吳振弱孫欲盡智  
能傾僭盜善持忠節輔庸昏宣王請戰貽巾幗始見才  
吞亦氣吞楊汝士詩古柏森然地修嚴蜀相祠一過榮  
異代三顧盛當時功德流何遠馨香薦未衰敬名探國

志節像慰思昔謁從征蓋今聞擁信旗固宜光寵下  
有淚刻前碑陳薦詩建安綱紀如綫微高光基業春秋  
危姦豪拔劍將羣盜駢龍控虎爭雄雌武侯當日臥南  
陽韜稜晦角陰營為高吟梁甫比管樂胸中造化無人  
知東吳北魏至強大不肯逆德為其師先主歆聞元直  
語三往咨求當世宜勤勤陳說扶漢室慷慨感義許驅  
馳一說孫權敗曹操劉氏遂聲中興基申明號令鼓雷  
電勗勵士卒寧蛟螭分留猛將控荆渚翼戴昭烈來坤

維獻皇遺害首勸進應天嗣位開羣疑本謀憑藉蜀富  
庶養威用作并吞資大勲未集昭烈崩遵守顧命如周  
伊均平賞罰重恩信比屋道路皆熙熙七擒孟獲除後  
患至今南詔崇靈祠東征直據五大原欲復咸鎬綏華  
夷上成先帝創業意下副四海蒼生思推忠仗順氣百  
倍俯視敵衆真嬰兒流星落帳芒角惡暴然不起軍如  
癡仲達雖走禪終虜人謀不可違天時精魂埋沒已千  
歲柰無英傑齊高規朔方男子過廟下秋天寥落霜風

悲林梢脫葉響颼颼煙頭暮雨寒絲絲妖狐恠兔穴壞  
壁饑鵲餓鵲啼枯枝樵兒敲斷段尹石苔蘚爛斑裴相  
碑手植勁栢尚蒼翠疑有神靈潛護持眸容昏剝堂廡  
陋龍祠神廟窮珍奇吾心切切慕風槩灑淚踟躕成此  
詩宋京詩云君不見孔明書臺遺廟旁古書不見臺荒  
涼臥龍未起蜀天遠茅廬日日空南陽赤符光寒白水  
涸秣陵王氣猶能作璋若嬰兒操虎狼脫去荊州殊不  
惡十倍奇才安用書此臺昔時知有無蜀人思君識故

處未若江水存兵圖黃冠所居門第改祗有坊名今尚在安得臺邊見古人秋草重生類書帶蜀古蹟記云宋曹彬建隆二年為都監伐蜀謁武侯祠視宇第雄觀頗有不平謂左右曰孔明雖忠于漢然疲竭蜀之軍民不能復中原萬一何得為武當因其頽敗者折去之止留其中以祀香火左右皆諫不可俄報中殿摧塌有石碑出土尺許彬逕視之其刻字宛若新書題云測吾心腹事惟有宋曹彬讀訖下拜曰公神人也小子安能窺測

哉遂令蜀守新其祠宇為文祀之而去按此古昔武侯祠也天社任淵記云昭烈廟西偏少南又有別廟忠武侯在焉老栢叅天氣象甚古詩人嘗為賦之是矣今武侯祠在百花潭與草堂並列者不知何代增設

蜀中廣記卷一



欽定四庫全書

蜀中廣記卷二

明 曹學佺 撰

名勝記第二

川西道

成都府二

西門之勝張儀樓石筍街笮橋琴臺浣花溪青羊宮淨  
衆寺少陵草堂其最著者 任豫益州記曰諸樓年代

既久榱棟非昔惟西門一樓雖有補葺張儀時舊跡猶存古今集記云張儀樓高百尺初張儀築城雖因神龜然亦順江山之形以城勢稍偏故作樓以定南北李膺記曰成都有百尺樓後名為白菟樓也晉張載登成都白菟樓詩重城結曲阿飛宇起層樓累棟出雲表嶢嶢臨太虛高軒啟朱扉迴望暢八隅西瞻岷山嶺蹇我似荆巫蹲鵠蔽地生原隰殖嘉蔬雖遇堯湯世民食恒有餘鬱鬱少城中岌岌百族居街術紛綺錯高甍夾長衢

借問揚子宅相見長卿廬程卓累千金驕奢擬五侯門  
有連騎客翠帶腰吳鉤鼎食隨時進百和妙且殊披林  
採秋橘臨江釣春魚黑子過龍醢果饌踰蟹蟄芳茶冠  
六清溢味播九區人生苟安樂茲土聊可娛唐岑參張  
儀樓詩傳是秦時樓巍巍至今在樓南兩江水千古長  
不改曾聞昔時人歲月不相待杜甫和嚴中丞西城晚  
眺詩云汲黯匡君切廉頗出將頻直辭才不世雄畧動  
如神政簡移風速詩清立意新層城臨暇景絕域望餘

春旗尾蛟龍會樓頭燕雀馴地平江動蜀天濶樹浮秦  
帝念深分閫軍須遠算緡花羅封蛺蝶瑞錦送麒麟辭  
第輸高義觀圖憶古人征南多興緒事業暗相親段文  
昌晚夏登張儀樓呈院中諸公詩重樓窻戶開四望歛  
煙埃遠岫林端出清波城下迴乍疑蟬韻促稍覺雪風  
來併起鄉關思銷憂在酒盃姚向和云秦相架羣材登  
臨契上台查從銀漢落江自雪山來儷曲親流火凌風  
洽小杯帝鄉如在目欲下盡徘徊溫會和云危軒重疊

開訪古上徘徊有舌嗟秦策飛梁認楚材雲霄隨鳳到  
物象為詩來欲和關山意已歌調更哀楊汝士和云從  
公城上來秋近絕纖埃樓古秦規在江分蜀望開遠山  
標宿雪末席接寒灰陪賞今為忝臨歡敢訴杯李敬伯  
和云層屋架城隈賓筵此日開文鋒摧八韻星分應三  
台望雪煩襟釋當歡遠思來披雲霄漢近覽覺出塵埃  
姚康和云登覽值晴開詩從野思來蜀川新草木秦日  
舊樓臺池影搖中座山光接上台近秋宜晚景極目斷

浮埃 石經始末云錦官西樓有胡元質所鑱石經數板蓋公得五代時墜刻于一二故家殘圭裂璧亦可寶也凡蔡中郎石經四千二百七十字有奇及古文篆隸三體石經遺字八百一十九黃山谷跋張載熙書卷尾云蘭亭禊飲詩叙二本前一本是都下人家用定武舊石刻摹入木板者一本以門下蘇侍郎所藏唐人臨寫墨跡刻之成都西樓中有數字極瘦勁不凡東坡謂此本乃絕倫也陸游跋東坡書髓帖云成都西樓下石刻

東坡法帖十卷擇其尤奇逸者為一編號東坡書髓三  
十年間未嘗釋手去歲都下脫敗甚乃再裝緝之嘉泰  
三年歲在癸亥九月三日老學菴北窗手記 常璩云  
蜀有五丁力士能移山舉萬鈞每王薨輒立大石長三  
丈重千鈞為墓志今石笋是也號曰笋里寰宇記云武  
擔石俗曰石笋在州城西門大街中益部耆舊傳云公  
孫述時武擔石折任文公歎曰西方智士死吾當應之  
歲中卒庾信演連珠云竹杖扶危不能正武擔之石矣

通志云雙石笋在興義門內即真珠樓基也按西門王建武成謂之興義門矣李膺記云開明氏造七寶樓以珍珠為簾其後蜀郡火民家數千與七寶樓俱燬趙清獻記曰真珠樓基在石笋街一說有大秦胡于其地起寺門樓十間皆飾以真珠翠碧貫之如簾寺即大秦寺也老杜石笋行君不見益州城西門陌上石笋雙高蹲古來相傳是海眼苔蘚蝕盡波濤痕雨多往往得瑟瑟此事恍惚難明論註云成都子城西金容坊有石二株



挺然聳峭高大餘耆舊傳云其名有六曰石笋曰蜀妃  
闕曰沈犀石曰魚鳧仙壇曰四海之眼曰五丁石門皆  
非也圖經云乃前寺之遺址諸葛亮掘之方驗有篆字  
曰蠶叢氏啟國誓蜀之碑以二石柱橫埋連接鐵其中  
一南一北無所偏邪上有濁歎燭觸蠲五字時人莫曉  
蜀相范賢議曰亥子歲濁字可記主水災寅卯歲歎字  
可記主饑饉巳午歲燭字可記主火災辰戌歲觸字可  
記主兵災申酉歲蠲字可記主稼穡富贍悉以年事推

應符響矣 徐康晉記桓溫伐蜀戰于笮橋叅軍襲護  
戰沒衆欲退而鼓吏誤鳴進鼓於是乘之遂入少城寰  
宇記云笮橋去州西四里名夷里橋以竹索為之因名  
笮橋李膺笮橋贊云複引一索飛絙杙閣其名曰笮人  
懸半空度彼絕壑也益州記曰市橋笮橋今各有一鐵  
椎大十許圍長六七十尺云初營橋引機運此椎以擊  
橋柱本有三今餘二南史宋大始初益州笮橋忽生一  
洲道士柳石見之曰當有貴王臨州必有王勝喜也及

齊永明二年武帝遣始興王為益州勝喜者即始興反  
語蜀古蹟記曰笮橋邊有二石闕乃漢趙典墓矣王  
褒益州記曰司馬相如宅在州笮橋北百許步李膺云  
市橋西二百步得相如舊宅今海安寺南有琴臺故墟  
方輿勝覽云琴臺後為金花寺城內者非其舊也金花  
寺以晉胡僧持金花玉像住此故名按即今之金泉鋪  
矣梁簡文登琴臺詩蕪階踐昔徑復想鳴琴遊音容萬  
春罷高名千載留弱枝生古樹舊石染新流由來遞相

歎逝川終不收唐盧照隣相如琴臺詩聞有雍容地千  
年無四隣園院風煙古池臺松檟春雲疑作賦客月似  
聽琴人寂寂啼鶯處空傷遊子神杜甫詩茂陵多病後  
尚愛卓文君酒肆人間世琴臺日暮雲野花留寶曆蔓  
草見羅裙歸鳳求凰意寥寥不復聞高適同羣公秋登  
琴臺詩古跡使人感琴臺空寂寥靜然顧遺塵千載如  
昨朝臨眺自茲始羣賢久相邀德與形神高孰知天地  
遙四時何倏忽六月鳴秋蛩萬象歸白帝平川橫赤霄

猶是對夏伏幾時有涼森燕雀滿檐楹鴻鵠搏扶搖物  
性各自得我心在漁樵兀然還復醉尚握樽中瓢岑參  
詩相如琴臺古人去臺亦空臺上寒蕭條至今多悲風  
荒臺漢時月色與舊時同宋呂公弼詩煙樹重城側琴  
臺千古餘早為梁苑客晚向茂陵居賦給尚書筆歸乘  
使者車清風覲舊隱長日聳鄉閭宋祁詩故臺千古恨  
猶對舊家山半夜鸞凰去它年駟馬還死憂封禪晚生  
愛茂陵閒惟有飄飄氣仍存天地間歲華紀麗云正

月念八日出竿橋門即拜保壽侯祠次詣淨衆寺拜杜  
邠公祠按杜邠公悰唐元和間帥蜀者又蘇明允集有  
張文定方平公祠碑記亦在淨衆寺矣高僧傳云僧無  
相新羅國人開元十六年至成都募化檀越造淨衆寺  
影堂在焉寺有一巨鐘重千鈞會昌例毀此鐘乃移入  
大慈大中復還寺衆以其鐘大隔江計功兩日始到方  
欲為齋辰去已集乃知神力所拽也相有塔號東海大  
師塔云唐鄭谷西蜀淨衆寺松溪八韻兼寄小華崔處

士詩松因溪得名溪吹荅松聲繚繞能穿寺幽奇不在  
城寒烟齋後散春雨夜中平染岸蒼苔古翹沙白鳥明  
澄分僧影瘦光徹客心清帶梵侵雲響和鐘擊石鳴淡  
烹新茗爽暖泛落花輕此景吟難盡憑君畫入京又淨  
衆寺雜題水詩竹院松廊分數派不空清泚亦逶迤落  
花相逐去何處幽鷺獨來無限時洗鉢老僧臨岸久釣  
魚閒客卷綸遲晚晴一片連莎綠悔與滄浪有舊期七  
祖院小山詩小巧功成雨蘚斑軒車日日扣松闌栽眉

咫尺無人去却向僧窗看假山忍公小軒詩松溪水色  
綠于松每到松溪聽暮鐘閒得心源祇如此問禪何必  
向雙峯傳經院壁畫松詩危根瘦蓋聳孤峯珍重江僧  
好筆蹤得向游人多處畫却勝澗底作真松李洞宿成  
都松溪院詩松持節操溪澄性一炷嵐煙壓寺隅翡翠  
鳥飛人不見琉璃瓶貯水疑無夜聞子落真山雨曉汲  
波圓入畫圖塵擁蜀城抽鎖後此中猶夢在江湖宋范  
鎮淨衆寺新禪院詩金地西郊外一來煩念攄但逢是



仙境鮮不屬僧居岸綠見翹鷺溪清無隱魚殘陽已周  
覽欲去幾躊躇田況正月二十八日謁生祿祠遊淨衆  
寺詩千騎出重闌嚴祠淨宇鄰映林沽酒旆迎馬獻花  
人豔日披江霧香颺起路塵韶華特明媚不似遠方春  
按淨衆寺宋改為淨因寺今謂之萬佛寺也 蜀本記  
云老子為關令尹喜著道德經臨別曰子行道千日後  
于成都郡青羊肆尋吾今為青羊觀也古今集記云老  
子乘青羊降其地有臺存觀中有白玉蟾書碑字徑半

尺宋何耕詩云一再官錦城咫尺望琳宮未始得得求  
正墮役役中今朝弄晴雨策蹇隨春風頗愛意象古停  
驂少從容縹緲百尺臺突起凌半空憑欄俯修竹決皆  
明孤鴻信哉神僊宅不受塵垢蒙稽首五千言衆妙一  
以通靜觀萬物役豈假九轉功區區立訓誥亦哂河上  
公癡人慕羽化心外求鴻濛要騎白鶴背往訪青羊蹤  
此詩刻石于臺前缺數字方輿勝覽云浣花溪在城  
西五里一名百花潭按吳中復冀國夫人任氏碑記云

夫人微時以四月十九日見一僧墜污渠為濯其衣頃  
刻百花滿潭因名曰百花潭按蜀志補遺浣花谿有石  
刻浣花夫人像三月三日為夫人生辰傾城出遊成都  
記云夫人姓任氏崔寧之妾按通鑑成都節度使崔旰  
入朝楊子琳乘虛突入成都旰妾任氏出家財募兵得  
數千人自帥以擊之子琳敗走朝廷加旰尚書賜名寧  
任氏封夫人也蜀檇杭乾德五年四月十九日王衍出  
遊浣花溪龍舟綵舫十里綿亘自百花潭至于萬里橋

遊人士女珠翠夾岸日方午暴風起須臾雷電晦冥有  
白魚自江心躍起騰空而去或云變為蛟牛嶠李珣有  
浣花詞云昨日西溪遊賞芳樹奇花千樣鎖春光金樽  
滿聽弦管嬌妓舞衫香暖不覺到斜暉馬馱歸又云訪  
舊傷離欲斷魂無因重見玉樓人六街微雨鏤香塵早  
為不逢巫峽夢邨堪虛度錦江春遇花傾酒莫辭頻前  
調西溪子而後浣溪沙也宋祁浣花泛舟詩早夏清和  
在晴江公沂時岸風搖鼓吹波日亂旌旗醉帶牽細蔓

游鬢撲絳蕤樹來驚浦進山失悟舟移雅俗西南盛歸  
輶東北馳此歡那復得拋恨寄天涯又春日出浣花云  
側蓋天長蕩曉霏暖風才滿使君旗水通江渚容魚樂  
翠編山梁報雉時場雨減塵盤馬疾樓雲礙曲進觴遲  
少陵定畔吟聲歇柳碧梅青欲向誰田況四月十九汎  
浣花谿詩浣花溪上春風後節物正宜行樂時十里綺  
羅青蓋密萬家歌吹綠楊垂畫船疊鼓臨芳淑綵閣凌  
波汎羽卮霞景漸曛歸櫂促滿城懽醉待旌旗馬備浣

花谿詩浣花溪邊濯錦裳百花滿潭溪水香寶奩散盡  
買霜戰草林匹馬不可當當時濯衣只偶爾豈似取履  
張子房烈烈遽能蔽此蜀喪亂懷爾徒悲傷年年春風  
媚楊柳綠纔掩姍姍雲霞張溪邊遊冶紅粉娘了不識字  
空愁蠅採花蕩槳不歸去暮隔煙水眠幽芳黃魯直浣  
花溪圖引云拾遺流落錦官城故人作尹眼為青碧雞  
坊西結茅屋百花潭水潔冠纓故衣未補新衣綻空蟠  
胸中書萬卷探道欲度義皇前論詩未覺國風遠干戈

嶢嶢暗寓縣杜陵韋曲無雞犬老妻稚子宜眼前弟妹  
飄零不相見此心樂易真可人園翁溪友肯卜鄰鄰家  
有酒邀皆去得意魚鳥來相親浣花酒船散車騎野塙  
無主看桃李宗文守家宗武扶落日蹇驢馱醉起厭聞  
解鞍脫兜鍪老儒不用千戶侯中原未得平安報醉裏  
眉攢萬國愁生綃鋪塙粉墨落平生忠義公寂寞兒孫  
不蘇驢失脚猶恐醒來有新作常使詩人拜畫圖煎膠  
續弦千古無杜甫卜居詩云浣花溪水水西頭主人

為卜林塘幽已知出郭少塵事更有澄江銷客愁無數  
蜻蜓齊上下一雙鸂鶒對沈浮東行萬里堪乘興須向  
山陰上小舟此即草堂也楊慎引文選注云蕭齊周顒  
昔經在蜀以蜀草堂林壑可懷迺於鍾山雷次宗學館  
立寺因名草堂寺又云蜀人語草為茨成都令周顒既  
歸金陵乃倣蜀草堂寺遺意於鍾山之麓築草堂亦曰  
山茨不忘蜀也可知蜀之草堂寺著名久矣子美依其  
地而卜築題詠日多不具錄其時軒蓋過從有嚴中丞



仲夏枉駕草堂兼携酒饌得寒字作有王十七侍御掄  
許携酒至草堂奉寄詩便請邀高三十五使君同到作  
有王十五司馬弟出郭相訪兼遺營茅屋賢作雖稍為  
是以破岑寂而要之非其好也當時有南隣北隣者其  
人皆不俗子美南隣詩云錦里先生烏角巾園收芋栗  
不全貧慣看賓客兒童喜得食階除鳥雀馴秋水纔添  
四五尺野航恰受雨三人白沙翠竹江村暮相送柴門  
月色新北鄰詩云明府豈辭滿藏身方告勞青錢買野

竹白幘岸江臯愛酒晉山簡能詩何水曹時來訪老疾  
步履到蓬蒿又過南隣朱山人水亭詩云相近竹參差  
相過人不知幽花欹滿樹小水細通池歸客村非遠殘  
罇席更移看君多道氣從此數追隨斯蓋遺世之士忘  
機之侶矣岑參草堂村尋人不遇詩數株垂柳色依依  
深巷斜陽暮鳥飛門前雪滿無行跡應是先生出未歸  
范鎮題曹山人墅居詩溪接浣花饒勝致山人高隱在  
其中一江絲竹喧天沸爭及松篁半日風亦皆彷彿其

幽致也喻汝礪晚泛浣花遂宿草堂詩扣楫泛澄虛濯  
流睇幽芳晚霏襯奇樹夕霏媚疎篁歸鳥亦暫閒夜魄  
動初涼忽焉衆星微天高月舒光昔也杜陵子澹然此  
茅堂客至酒自斟句得意已忘云何常念饑零落在道  
旁古來技入神一飽豈屑望吾輩天所窮慨歌淚霑裳  
邵博同楊元澈遊草堂詩萬里橋西路幽居今尚存共  
來披草徑遠去問江村冉冉花扶屋蕭蕭竹映門斯人  
隔今古此意與誰論劉望之草堂詩風月藏詩骨流離

賦病骸不禁一飽死空遺百生懷樹秀天通隴山嬌客  
語淮壁間無半偈無乃望君厓捫膝先生又有草堂詩  
六首相相詩翁錦里西只緣詩好合窮栖竹鋪冷色雲  
連寺柳漾輕絲鳥過溪凝望不禁闌樹暗駐情應恨蜀  
山低離人苦怕春歸盡可忍紅英半著泥又云從教日  
日敞窓扉嫌怕風花入眼遲刺買芒鞋供看竹趁乘春  
雨去栽橙苦無賓客僧來後薄有生涯鶴下時聞道鄰  
翁酒初熟新篘一酌莫相違又云遠與曲洲縱復橫沙

邊繁鳥弄簫笙一軒簷冷松陰合十里林香樂草生路  
轉斷楂逢石坐風移深竹見僧行晚來冲抱更清曠時  
有幽人帶月耕又云亂後飄零歇此身風光無賴更清  
新客懷易感酒添病詩思苦慳花減春南枝北枝鶯舌  
巧前村後村雨脚勻暫借溪邊老為客花心柳眼莫撩  
人又云翠木搖艷溪之灣遊子失氣生愁酸誇力搏虎  
筋骨絕雙流迸巖道路難布衾多年窘夜雨土銼無火  
啼夕餐一生忠義老寂寞旋燒竹葉供春寒又云竹外

清疎浸碧溪溪邊竹淡煙雨霏閒看雪嶺題詩罷醉向  
西郊信馬歸霄漢直愁雙闕迴夢魂長著五陵飛故園  
秀水又春色只恐歸去池臺非宋京補亡詩云君不見  
少陵草堂背西郭浣花溪水流堂腳竹寒沙白自淒涼  
莫問四松霜草薄入門好在烏皮几公去不歸換鄰里  
西嶺千秋雪未消舍北泥融飛燕子祇今檜木平橋路  
籠竹和煙雜江霧野僧作屋號草堂不是柴門舊時處  
碑目云益州草堂寺列畫前長史一十四人代稱絕迹

李文饒跋云余嘗於數公子孫之家獲見圖狀乃知草堂繪事靡不逼真者方輿勝覽云梵安寺在成都縣南與杜甫草堂相接每歲四月中澣前一日太守宴集于此呂大防建草堂繪少陵像張燾盡取少陵詩勒石刻置焉何宇度益部談資云武侯工部二祠之中有寺一名草堂一名中寺前代為尼居名桃花寺隋文帝時始易以僧唐大厯中崔寧鎮蜀以冀國夫人任氏本浣花女遂重修之繪夫人真于中會昌亦在毀例夜聞女

子啼泣之聲而止宋朝禱雨有驗乃賜名梵安寺也按高僧傳唐僧旭上居草堂寺惟以禪誦為業蜀土尤尚二月八及四月八日每至二時四方大集馳騁遨遊旭公獨端坐竹林泊然寂想四衆覩之如朝日初出因目之為旭上云

東門之勝禹廟大慈寺散花樓合江亭薛濤井海雲寺其最著者張俞上蜀帥書俞再拜世言古之大聖人必曰三皇氏五帝氏犧農在上古其道不可復行故後



世唯以堯舜為法歷百聖人莫之能易而學者遂傳禹  
尚不及堯舜俞謂堯舜承四聖至治之業在位七十載  
故能道德行於天地萬物陶乎無為其後洪水暴九州  
十有餘年生民流宕彞倫壞斃堯視天下之溺如已溺  
焉乃博咨衆工若臯陶之倫咸不克其事然後舉舜舜  
亦不能治然後舉禹禹果能治之遂成大功舜有天下  
乃美禹曰地平天成六府三事允治萬世永賴時乃功  
是知滔天之害雖堯舜之聖必待禹而治之苟當時不

得禹也生民其如何後世其如何愚恐君臣父子不為  
魚鼈則九州萬國淪于海矣安有今日之治哉故謂開  
闢已來羣聖之功唯禹為大也百川之長有四瀆而江  
河為大江出蜀之西徼禹迺生于西羌石紐其地也今  
淫鬼無名饕蜀民之祀者迨將千百郡縣猶能存之而  
神禹為蜀人江漢為蜀望大功格天地利澤施萬世曾  
不得享蜀之祀若一淫鬼斯闕禮之甚者俞嘗恨焉伏  
惟明公治蜀滔滔江漢盡在土宇宜作禹廟用康斯民

昔尹吉甫作詩美申伯則曰王命申伯式是南邦因是  
謝人以作爾庸又美仲山甫則曰德輶如毛民鮮克舉  
之維仲山甫舉之言政事甚易而人不能行維仲山甫  
獨能舉而行之明公有申伯法度南邦之德有仲山甫  
賦政于外之功蜀人愛戴期乎無窮若禹廟之作乃政  
之易者衆不能舉明公若能舉之可謂存乎聖而順乎  
民也豈挾太山超北海之為力哉俞近述南賓郡修禹  
廟碑文一首其道備其事直文雖浮濫理或庶幾方刻

石以示後世謹錄一通上獻謂狂夫之言而棄之不敢  
逃戾若謂斯言可采斯廟可成宜載事于金石則江漢  
無盡明公之德亦無盡按此禹廟立于成都之始也今  
在城東北之馬務街歲久傾圯予以萬厯辛亥始克修  
復仍以蠶叢李永二神配于東西廡按方輿勝覽蜀王  
蠶叢叢氏祠今呼為青衣神在聖壽寺昔蠶叢叢氏教人養  
蠶作金蠶數十家給一蠶後聚而弗給瘞之江上為蠶  
墓南史齊永明間始興王蕭鑑為益州刺史於州園得

古家有金為蠶數斗鑑一無取復為起家立祠又按寰  
宇記秦李冰為蜀郡守有功於民舊祠在府西南三里  
及唐節帥李德裕重修今蠶叢祠已不存李冰祇李觀  
察家作宗祠耳會詘時勢不能特舉乃告于神附庸之  
且以紹禹之績焉 通志云大慈寺唐至德年建舊有  
肅宗書大聖慈寺四字蓋勅賜也故會昌不在除毀之  
例碑目云唐僧大辯修功德碑元和十五年立在寺之  
文殊閣唐韋南康碑二並在寺之資福殿中集古錄云

大慈資福院記唐李德裕撰長慶二年立石成都記云  
大慈極樂院有至和丙申季春二十八日眉陽蘇軾與  
弟蘇轍來觀盧楞伽筆迹留題陸游跋中和院東坡帖  
云此一卷皆蘇仲虎尚書所藏鑒定精審無一帖可疑  
者刻石在成都大聖慈寺中和勝相院淳熙六年六月  
十七日也成都太守田況三月十四日大慈寺建軋元  
節道場詩赤精流景鑠朱夏向清和紺宇修祠盛華封  
祝慶多簪裳千載遇鐘梵五天歌遠俗尤熙泰皇猷信

不頗又七月六日晚登大慈寺閣觀夜市詩萬里銀潢  
貫紫虛橋邊螭轡待星姝年年巧若從人乞未省靈恩  
徧得無又七月十八日大慈寺觀施盂蘭盆詩飛閣穹  
隆軼翠煙盂蘭盛會衆喧闐且欣酷暑從茲減漸有涼  
風快夕眠又冬至朝拜天慶觀會大慈寺詩景至履佳  
辰朝祝著國令黃宮啟潛萌紫宇晨蔭映陽德比君子  
吾道實可慶矧丁皇運亨遇主堯舜聖坤維最遠方拙  
者此尸政雅俗舊儒文民牒少訟爭幸足宣上恩惟恐

盤物性良時不易得行樂未為併高會縱嬉遨豐歲愈  
繁盛與衆助驩欣寄情於俚詠范成大會慶節大慈寺  
茶酒詩霜輝催曉五雲鮮萬國懽呼共一天淡淡暖紅  
旗轉日浮浮寒碧瓦收煙銜盃樂聖千秋節擊鼓迎冬  
大有年忽憶捧觴供玉座不知身在雪山邊方輿勝  
覽云雪錦樓在大慈寺門元宵守帥遊賞于此李燾十  
五日同登大慈寺樓得遠字詩重樓得雲氣深穩戶牖  
誰能發闕鍵樓下輪蹄渙散馳行人一顧不容返好遊



獨是我輩閒褰衣直上相推挽  
層軒危檻倚欲遍更假  
胡床同息偃西南繁會惟此都  
昔號富饒今已損填城  
華屋故依然孰為君王愛基本  
茫茫八表聊縱目情知  
日近長安遠白雲浩蕩飛鳥沒  
玉笙淒涼紅粉晚梁王  
吹臺得李杜黃公酒壚醉嵇阮  
高風千載凜莫扳與世  
相濁徒混混荷衣蕙帶芙蓉裳  
野服猶堪敵華袞去梯  
孰復共君謀殺馬毀車從此遁  
勝覽云成都古蠶叢之  
國其民重蠶事故一歲之中二  
月望日鬻花木蠶器號

蠶市五月鬻香藥號藥市冬月鬻器用者號七寶市俱  
在大慈寺前宋祁大慈寺前蠶市詩蜀雖云樂土民勤  
過四方寸壤不容隙僅能充歲糧間或容墮爛曷能備  
凶瘁所以農桑具市易時相望野氓集廣鄺衆賈趨寶  
坊惇本誠急務戒其靡恣常茲會良足喜後賢無忽忘  
田況大慈寺前蠶市詩高閣長廊門四開新晴市井絕  
纖埃老農肯信憂民意又見笙歌入寺來 蜀檇杙云  
孟知祥明德元年六月幸大慈寺避暑觀明皇僖宗御

容已宴羣臣於華嚴閣下孟昶廣政元年上已遊大慈  
宴從官于玉溪院賦詩通志云解玉溪在華陽大慈寺  
南韋南康所鑿也溪中細沙可以解玉蘇子瞻集成都  
玉溪之上有清風閣文慧大師應符所建因為之記矣  
方輿勝覽云諸葛井在大慈寺西里許自上窺之祇  
見其三邊更一邊不知其際涯也昔孔明鑿此以通井  
絡王氣俗傳有人入井聞其中有雞聲又云興福寺即  
昭覺院相對有天涯石按即今之寶光寺矣天涯石詳

見詩話中 東城樓即散花樓也李白登錦城散花樓  
詩日照錦城頭朝光散花樓金牕夾繡戶珠箔懸瓊鈎  
飛梯綠雲中極目散我憂暮雨向三峽春江繞雙流今  
來一登望如上九天遊按輿地紀勝散花樓隋開皇建  
乃天女散花之處蜀檣杙云孟昶有國宮苑城上盡種  
芙蓉謂左右曰真錦城也唐武元衡中秋夜錦樓望月  
分韻詩得東字玉輪初滿空迴出錦城東相向秦樓鏡  
分飛碣石鴻桂香隨窈窕珠綴隔玲瓏不及前秋見團

圓鳳沼中王良會得清字德星搖此夜珥月滿重城香  
靄煙嵐色飄飄砧杵聲令行秋氣爽樂感素風輕共賞  
千年聖長歌四海清柳公綽得濃字此夜年年月偏宜  
此地逢近看江水淺遙辨雪山重萬井金花肅千林玉  
露濃不唯樓上思飛蓋亦陪從張正一得蒼字高秋今  
夜月皓皓正蒼蒼遠水澄如練孤鴻迴帶霜旅人方積  
思繁宿稍沉光末濫叨陪賞尤宜清漏長徐放得來字  
玉露中秋夜金波碧落開雀驚初泛濫鴻思共徘徊遠

目清光徧高空  
爽氣來此時  
陪永望  
更得上燕臺  
崔嵬備得前字清景同  
千里寒光盡  
一年竟天多鴈過  
通夕少人眠  
照別江樓上  
添愁野帳前  
隋侯恩未報  
猶有夜珠圓  
又得秋字  
四時皆有月  
一夜獨當秋  
照耀初含露  
徘徊正滿樓  
遙連雪山淨  
迴入錦江流  
願以清光末  
年年許從遊  
溫庭筠錦城曲  
云蜀山攢黛留晴雪  
蔡筍蕨牙縈九折  
江風吹巧剪霞綃  
花上千枝杜鵑血  
杜鵑飛入巖下藤  
夜叫思歸  
山月中巴水  
漾情情不盡  
大君織得

春機紅怨魄未歸芳草死江頭學種相思子樹成寄與  
望鄉人白帝荒城五千里張承吉錦城詩錦江城外錦  
城頭回望秦川上軫憂正值血魂來夢裏杜鵑聲在散  
花樓高駢錦城春望詩蜀江波影碧悠悠四望煙花匝  
郡樓不會人家多少錦春來盡挂樹梢頭卓英英錦城  
春望詩和風粧點錦城春細雨如絲壓玉塵漫把詩情  
訪奇景艷花濃酒屬閒人眉娘和云蠶市初開處處春  
九衢明艷起香塵世間總有浮華事爭及仙山出世人

斯二作皆女郎也又顧雲有濯錦江秋澄倒碧散花樓  
晚掛殘紅之句並稱警秀矣 括地志云大江一名汶  
江西南自溫江縣來郫江一名永平江西北自新繁縣  
來昔李冰穿二江城中皆可行舟合於城之東南岸曲  
有合江亭唐符載云一都之奇勝也是亭鴻盤如山橫  
架赤霄廣場在下砥平雲截而東南西北負然矣宋呂  
大防合江亭記云沱江自岷而別張若李冰之守蜀始  
作埧以捷水而闢溝以醜之大溉蜀郡廣都之田用以



富饒今成都二水此江沱支流來自西北而匯于府之  
東南乃所謂二江雙流者也沱舊循南湟與江並流以  
東唐高駢斥廣其穢遂塞康棗故瀆始鑿新渠繚出府  
城之北然猶合於舊渚舊渚者合江故亭唐人宴餞之  
地名士題詩往往在焉久弗不治余始命葺之以為船  
官治事之所俯而觀之滄波修濶渺然數里之遠東山  
翠麓與煙林篁竹列峙于其前鳴瀨抑揚鷗鳥上下商  
舟漁艇錯落游行春朝夕置酒其上亦一府之佳觀

也按卽今之錦官驛矣宋周燾合江亭詩云共思赤脚踏層冰聊適江臯興自清昨夜雨聲驅濁暑曉來烟水快新晴山疑九疊張雲勢灘激千巖落布聲巾屨從來在丘壑願陪閒日此閒行其二却暑追隨水上亭東郊乘曉戴殘星餘歌咽管來幽浦薄霧疎烟入畫舲興發江湖馳象魏情鍾原隰詠飛鵠故溪何日垂綸去天末遙岑寸寸青和者為田望吳棫孫竢諸君子惟竢有舊聞蜀地四時雨今快岷山千里晴之句可謂得驪珠矣

楊甲合江泛舟詩云莫踏街頭塵寧飲城東水江頭放  
船去葦間問漁子岸深魚有家鳬鴈在中汀得酒可以  
歌得樹可以艤年年舟中客顏色不相似風波無前期  
遊者亦如此短篙醉時策遠山醉時几我老不柰醒日  
落西風起晁公遡合江舟中詩云雲氣昏江樹春流沒  
釣磯何如連夜漲似欲送人歸亂石水聲急片帆風力  
微舟師且停櫓白鷺畏人飛白麟合江探梅詩云艇子  
飄搖喚不回半溪清影漾疎梅有人隔岸頻招手和月

和霜剪取來何耕自合江亭過渡觀趙穆仲園亭詩喚  
舟芳草渡繫馬綠楊陰步入莓苔徑門開花竹林王孫  
隨蹠遠嫠女隱雲深想見西南望悠悠空賞心陸務觀  
有遊東郭趙氏園詩清晨呼馬出馭吏請所之錦城浩  
如海我亦無與期有花即入門莫問主人誰下馬據胡  
牀傲睨忘訶譏人言白頭翁胡為尚兒癡老翁故不癡  
惜花發吾詩詩句帶花香東風不敢吹徘徊雙蛺蝶許  
汝鼻端知此二園者亦與錦江相左右也 薛濤井舊

名玉女津在錦江南岸水極清冽濤詩序云濤字洪度  
本長安良家女父鄭因官寓蜀而卒母孀居濤及笄以  
詩聞外又能掃眉塗粉與士族不侔客有竊與之燕語  
時韋中令臯鎮蜀召令侍酒賦詩僚佐多士為之改觀  
其歲中令議以校書郎奏請之護軍曰不可遂止濤出  
入幕府自臯至李德裕凡歷事十一鎮皆以詩受知其  
間與濤倡和者元稹白居易牛僧孺令狐楚裴度嚴綬  
張籍杜牧劉禹錫吳武陵張祐餘皆名士記載凡二十

人競有酬和濤僑止百花潭躬撰深紅小彩牋裁書供  
吟獻酬賢傑時謂之薛濤牋晚歲居碧雞坊初吟詩樓  
偃息于上後段文昌再鎮成都太和歲濤卒年七十五  
文昌為撰墓誌題曰西川校書薛洪度之墓按濤錦江  
春望詞云花開不同賞花落不同悲欲問相思處花開  
花落時其二檻草結同心將以遺知音春愁正斷絕春  
鳥復哀吟其三風花日將老佳期猶渺渺不結同心人  
空結同心草其四那堪花滿枝翻作兩相思玉箸垂朝

鏡春風知不知王建寄之詩云萬里橋邊女校書  
枇杷花裏閉門居掃眉才子知多少管領春風總不如  
海雲山在錦江下流十里有海雲寺鴻慶院諸勝吳中復  
游海雲寺唱和詩王霽序云成都風俗歲以三月二十  
一日遊城東海雲寺摸石於池中以為求子之祥太守  
出郊建高旗鳴笳鼓作馳騎之戲大譙賓從以主民樂  
觀者夾道百重飛蓋蔽山野譙謳嬉笑之聲雖田野間  
如市井其盛如此渤海吳公下車朞月簡肅無事從俗

高會于海雲酒既中顧謂寮屬曰一觴一詠古人之樂  
事也首作七言詩以寫勝事席客亦有以詩獻者更相  
酌和得一十三篇廼命幕下吏會稽王霽為之序霽斐  
薄不能文恐愧勉從公命夫俳倡絲竹其樂外也吟詠  
情性其樂內也充諸內則能遺外之樂流於外則內有  
所喪今公既推內之樂以樂賓又盡外之樂以樂民可  
謂得其樂矣中復詩云錦里風光勝別州海雲寺枕碧  
江頭連郊瑞麥青黃秀遠路鳴泉深淺流彩石池邊成



故事茂林坡上憶前遊綠樽好伴衰翁醉十日殘春不  
少留范純仁和云東郊行樂冠西州古寺宕堯翠嶺頭  
化俗文翁傳愷悌尋山謝傅繼風流天涯樽酒欣相遇  
劍外三春得共遊雅興直須窮勝賞年光難使隙駒留  
韓宗道和云茂林修竹翠煙收寺枕清江最上頭好鳥  
啼春知客恨落花浮水近人流政閒不廢登臨賞意適  
直成汗漫遊紫陌紅塵歸路遠夕陽回首重遲留勾士  
良和云佛土依山福遠州春行繡騎上雲頭補天彩石

盈池在朝海清江繞寺流四國仰煩郇伯勞羣生翹望  
謝安遊早知為礪為霖意惟有西民欲暫留薛綽和云  
寺上靈峯更近州喧闐駟從錦纏頭歌鐘乍奏晴雷殷  
戈甲急趨春水流幾處醉眠方枕藉一城謠俗重嬉遊  
賢侯惠意民知否幾刻嚴闥為爾留宋祁集海雲鴻慶  
院詩地勝祠仍古春餘物徧華山雲時抱石佛雨不萎  
花嶺挾樓梯峻巖牽殿城斜淙谿雜環珮怪蔓走龍蛇  
供座僧飛鉢香園客戲沙吾遊真草草深意寄烟霞趙

扞遊海雲山詩縹緲齊雲閣喧闐摸石池物華春已盛  
人意樂無涯羅綺一山徧旌旗十里隨遨棚夾歸路驍  
騎看星馳蘇軾和云笙歌揭虛閣帷幕匝春池且與民  
同樂都忘天一涯舊游嗟倏忽故步喜追隨陌上人如  
堵歸鞍莫載馳邢夢臣和云使旌駟近郭民宴列芳池  
洩洩春臺上沉沉暮海涯鴻驚人宛轉電激騎追隨此  
會經年至須防日似馳霍交和云山深藏古寺傍枕舊  
芳池鼓響揭雲外石探從水涯使旌遊不倦瑞麥獻相

隨事簡民同樂歸心莫競馳韓絳遊鴻慶寺詩久旱雨  
初足樂遊春正深喧闐觀士女清曠入山林佛界雲成  
寶僧園地布金方塘探子石高閣會賓簪沙水通溪白  
松筠逐徑陰紛華從滿目幽寂自虛心印組端為累巖  
扃得暫尋晚風吹綠野歸騎已駸駸吳師孟和云十里  
東郊道茲遊歲月深參僚從行府高會適叢林穉子喧  
沽玉春姬笑予金咳珠僧獲寶醉弁客遺簪天賜連宵  
澤民歡畢晝陰分明造物手自在出塵心非相雖無住

殘芳尚可尋都人望旋旆車馬又駸駸范成大十一月  
海雲賞山茶詩門戶懽呼十里村牕前風物已知春兩  
年池上經行處萬里天邊未去人客鬢花身俱歲晚粧  
光酒色且時新海雲橋下溪如鏡休把冠巾照路塵十  
二月海雲賞山茶詩追趁新晴管物華馬蹄鬆快帽簷  
斜天南牕盡風晞雪水下春來水漱沙已報主林催市  
酒仍從掌故問山茶豐年自是驪聲沸更著衙前畫鼓  
樓喻汝礪遊海雲山詩渺渺天宇初便復有此山清晨

及茲游遐想百代前來者幾何人當時各為歡淑質揚  
妙舞哀絲遞清彈樂事坐如昨芳歲已屢彈向來所游  
人落葉不復還迥然散遠目感之為長歎竹迺非舊所  
無巢豈昔念誰當久存而不住所緣破涕聊一怡山  
知夢妍亦知後世士誰復當來旋

蜀中廣記卷二

欽定四庫全書

史部

蜀中廣記卷  
四三

詳校官編修<sub>臣</sub>翟 棟

編修<sub>臣</sub>程嘉謨覆勘

總校官庶吉士<sub>臣</sub>何思鈞

校對官學正<sub>臣</sub>陳 本

謄錄舉人<sub>臣</sub>羅允文

欽定四庫全書

蜀中廣記卷三

明 曹學佺 撰

名勝記第三

川西道

成都府三

北門之勝武擔山子雲宅金馬祠太玄城玉局觀昇仙  
橋萬歲池學射山其最著者 寰宇記云武擔山在府



城西北一百二十步一名武都山蜀記云武都山精化為女子美而艷蜀王納為妃不習水土欲去王必留之作東平之歌以悅之無幾物故王乃遣武丁于武都擔土為塚蓋地數畝高七尺上有一石圓五寸徑五尺瑩澈號曰石鏡王見悲悼遂作史邪之歌龍歸之曲路史曰開明妃墓今武擔山也有二石闕石鏡武陵王蕭紀掘之得玉石棺中美女容貌如生體如冰掩之而寺其上鏡周三丈五尺杜甫題石鏡詩蜀王將此鏡送死置

空山冥漠憐香骨提携近玉顏衆妃無復歎千騎亦虛  
還獨有傷心石埋輪月宇間按武擔山今在藩司門右  
守西道設焉祇一坏土耳揚子雲賦所謂武擔鎮都刻  
削成劉王基既夷蜀堠尚叢也昔有呪土寺東西二臺  
西臺有暑雪軒諸勝唐王勃游武擔山序云若夫武丘  
仙鎮吳王殉歿之墟驪嶠崇基秦帝升遐之宅雖珠衣  
玉匣下賁窮泉而廣岫長林終成勝境亦有霍將軍之  
大隧迥寫祁連樗里子之孤墳竟開長樂豈如武擔靈

嶽開明故地蜀夫人之葬迹任文公之死所罔巒隱隱  
化為闌嶁之峯松柏蒼蒼即入祗園之樹引星垣於杏  
嶂下布金沙樓日觀于長崖傍臨石鏡瑤臺玉梵尚控  
霞宮寶刹香壇猶分仙闕琯櫳接映臺疑夢渚之雲壁  
題相輝殿寫長門之月美人虹影下綴虬幡少女風吟  
遙喧鳳鐸羣公以玉津豐暇僚林壑而延情錦署多閒  
想巖泉而結興于是披桂幌厯松扉梵筵霞屬禪扃煙  
敞鷄林俊賞蕭蕭鷺嶺之居鹿苑仙談疊疊龍宮之偈

于時金方啓序玉律驚秋朔風四面寒雲千里層軒迴  
雪齊萬物于三體綺席乘雲窮九垓于一息碧鷄靈宇  
山川極望石兕長江汀洲在目龍鑣翠輶駢闐上路之  
遊列榭崇闐磊落名都之氣眇眇焉洋洋焉信二蜀之  
奇觀也昔者升高能賦勝事長存登嶽長謠清標未遠  
敢扳盛組下揆幽襟庶旌西土之遊遠嗣東平之唱云  
爾蘇頌武擔山寺詩武擔獨蒼然墳山下玉泉鱉令時  
共盡龍女事同遷松柏銜哀處幡花種福田詎知留鏡

石長與法輪圓段文昌題武擔寺西臺詩秋天如鏡空  
樓閣化玲瓏水暗餘霞外山明落照中鴈行看漸遠松  
韻聽難窮今日登臨意多歡語笑同姚向和云開閣錦  
城中餘閒訪梵宮九層連畫景萬象寫秋空天半將身  
到江長與海通提携出塵土曾是穆清風溫和和云桑  
門煙樹中臺榭造雲空眺聽逢秋興篇辭變國風坐愁  
高鳥起笑指遠人同始愧才情薄躋扳繼韻窮楊汝士  
和云清淨此禪宮層臺復倚空偶時三伏外列席九霄

中平視雲端路高臨樹杪風自憐榮末座前日別池籠  
李敬伯和云臺上起涼風乘閒覽歲功自隨台席貴盡  
許羽觴同樓殿斜暉照江山極望通賦詩思共樂俱得  
詠時豐姚康和云松逕引清風登臺古寺中江平沙岸  
白日下錦川紅疎樹山根淨深雲鳥跡窮自慚陪末席  
便與九霄通薛濤有段相國遊武擔寺病不能從題寄  
云消瘦翻堪見令公落花無那恨東風儂心猶道青春  
在羞看飛蓬石鏡中宋蒲瀛游呪土寺西臺詩偶到城

西寺人言呪土墳夕陽臺半出秋草徑纔分地下無紅  
粉天邊有碧雲徘徊追往事風急葉紛紛又東臺詩城  
郭層臺迥祇園細路通小亭虛白日老樹足秋風閱世  
年年改傷心處處同黃泉魂在否紅粉亦成空喻汝礪  
遊西臺院暑雪軒觀石鏡詩城中苦伊鬱茲軒獨高騫  
連甍動參差錯畦橫阡眠雪嶠政孤峙若與我周旋遠  
翠浮蕩漾輕鷗下聯軒密竹冒幽逕新蒲澹清漣初游  
恆餘懷既久幽念攢慨彼泉下人灼灼夸令顏忽焉墮

榛莽窈窕不可援一鏡空復情況乃塊石頑哀哉彼愚  
子婉孌情可牽差勝茂陵公更詠方士言吳棫題暑雪  
軒詩呪土臺頭寺披襟笑語閒千年雲抱石六月雪彌  
山酒熟驚嘗外茶新碾試間要湏時點筆來此賦躋扳  
周燾和云崇臺窮石照氣味樂偷閒南陸朱明馭西闌  
白雪山茶甌回舌本麈尾落談間欲綴風煙句彌高不  
可扳田望和云聖福軒重敞偶來心地閒因談丁士冢  
知是武擔山人在冰壺裏天垂玉壘間賡歌白雪句已



客強追扳孫竈和云地僻宜逃暑官曹幸頗閒虛傳力  
士擔始信蜀妃山嶺雪青霄畔城煙密樹間清談客款  
接妙句獨難扳王澧和云望處疑蓬島天長碧海閒雲  
霞收玉宇煙浪湧銀山茶入清談裏風生兩腋間詩成  
似西嶺高嶮不容扳宋京補亡詩云君不見蜀王妃子  
墓突兀城中若山積墓頭寒鏡澁無光妬月欺煙化為  
石鴻荒無根憑野史直謂山妖化妃子臨終未免懷首  
丘運土山中葬于此山名武擔錦江邊用是得名千萬

年如今佛閣倚空翠老木盤鬱摩蒼天晴雲入穴西山  
出捲簾坐見嵐光滴安得大如汲冢書免使後人疑往  
昔按唐明皇幸蜀從行妃子亦有葬此山者古今集記  
云望妃樓在子城西北隅明皇以妃墓在武擔山為此  
樓以望之矣陸游行武擔西南村落有感詩騎馬悠然  
欲斷魂春愁滿眼與誰論市朝遷變歸無沒磳谷訝呀  
互吐吞一徑松楠遙見寺數家雞犬自成村最憐高冢  
臨官道細細煙莎遍燒痕註云有大家高數丈旁又一

家差小莫知何代人也俗號太子墓成都文類云武擔山循城而西有前蜀王光圖墓墓前有永寧佛宮王氏拜掃之所多檀木國志云成都四出大道道實二十里有衢今言十八里者昔蜀王女未嫁年二十亡王哀悼不忍言二十故言十八也王女墓在城北今王女陌是也寰宇記云子雲宅在少城西南角一名草玄堂何涉讀易堂記云楊雄有宅一區在錦官西郭隘巷著書墨池在焉按今在藩司西南隅屬城之北與郡縣俱

移來者墨池二字舊是米顗書扁刻于石矣古今詩話  
唐馮涓字信之信都人大中初舉進士登宏詞科時危  
隱商山十年昭宗以為眉州刺史陳田拒命涓棄郡於  
成都墨池灌園自給焉王勃詩亂竹開三徑飛花滿四  
鄰從來楊子宅別有尚玄人岑參詩吾悲子雲居寂寞  
人已去娟娟西江月猶照草玄處精怪意無人昨盱藏  
老樹宋初詩宅廢經池在人工墨溜乾蟾蜍兼滴破科  
蚪共書殘蠹罷芸猶翠蒸餘竹自寒宅楊無可問撫物

費長嘆蒲瀛詩寂寞一區宅沈冥千載豪但輕執戟賤  
誰識草玄高蚪蚪猶翻墨提壺欲載醪著書端有意不  
必反離騷邵博詩自負天人學甘居寂寞濱却憐載酒  
客似識草玄人三世官應拙一區宅更貧千年尋故里  
感涕獨沾巾喻汝礪詩讀書豈不好憂憤還自茲書中  
見古人隱閔惻餘思遇險理有激尋分意多隨娟娟感  
姱容戚戚念幽棲曾是無間然孰為愜所宜覽之不自  
聊悵焉起遙悲宋京補亡詩云君不見子雲草玄西郭

門一逕秋草閒朝昏何須筆冢高百尺池墨黷今猶  
存童烏侯芭竟零落玄學無人終寂寞漢家執戟知幾  
年垂老身投天祿閣俗兒紛紛重劉向思苦言艱動嘲謗  
漢已中天雄亦亡不較空文從覆醬如今却作給孤園  
吐鳳亭前池水寒安得斯人尚可作會有奇字令君看  
按野客叢談劉棻嘗從雄學作奇字者古文之變體也  
自秦壞古文有八體一曰大篆二曰小篆三曰刻符四  
曰蟲書五曰摹印六曰署書七曰殳書八曰隸書王莽

時使甄豐改定古文復有六書一曰古文孔氏壁中書也二曰奇字即古文而異者三曰篆書秦篆書也四曰佐書即隸書也五曰繆篆所以摹印也六曰鳥書所以書幡信也袁說友成都文類云益州中興寺內有墨池揚子雲讀書處畫像存焉圖經云中興寺有子雲載酒亭是矣成都記云唐高僧智浩嘗於中興寺誦法華經鄰有龍女祠龍母夜聽之一夕施一寶珠浩曰僧家無用此龍以神力化大圓石榴而去今以水澆之則龍宮

石室四字隱隱可見岑參詩龍女何處來來時乘風雨  
祠堂青林下宛宛如相語蜀人競祈恩捧酒仍擊鼓  
輿地紀勝云金馬碧雞祠在金馬坊前漢宣帝聞益州  
有金馬碧雞之神遣諫議大夫王褒持節醮祭而致之  
宋朝賜為昭應廟封其神為靈光侯漢祭金馬碧雞文  
曰持節使者王褒敬移南崖金精神馬縹縹碧雞處南  
之荒深溪迴谷非土之鄉歸來歸來漢德無疆廣于唐  
虞澤配三皇黃龍見兮白虎仁歸來歸來可以為倫歸



兮翔兮何事南荒也按今北門內石馬巷有石馬足陷  
入地金馬祠在巷內碧雞坊則在城之西南杜甫詩云  
時出碧雞坊西郊向草堂是矣古今集記云高駢以  
成都土惡城歲壞易以磚甃凡負城邱陵悉平之以便  
農桑訖功筮得大畜之象曰畜者養也濟以剛健篤實  
輝光日新吉孰大焉文為以下存上因名太玄城詩話  
總龜載五五復五五五逾重數浮世若浮雲金石一  
如故與君相見時杳杳非今土右詩見於成都羅城北

門壞石上有乾符三年高駢名銜餘字斷缺莫知其為  
何詩也成都記高駢展築羅城下令縱民游觀有孕婦  
至城北樓免一女駢聞之曰此城他日代代客人為主  
其後牧守果皆京師所命碑目云高駢築城記唐中和  
四年翰林王徽作在城中信相院宋祁題信相院默菴  
詩對言方有默因默乃名菴菴留默不遣一物遂為三  
龜掃泥中痕正恐力弗堪自問呵默者了然成妄談景  
文又題北樓詩云少城西北之高樓此地蒼茫天意秋

驚風白日忽已晚落葉長年相與愁極塞雲物自慘澹  
趨林鳥雀時啁啾纓上朔塵久不洗安得手弄滄江流  
按今北門謂之大安門亦王建武成所命也 華陽國  
志城北十里昇僊橋有送客觀司馬相如初入長安題  
市門曰不乘赤車駟馬不過汝下也唐咸通中雲安進  
士李遠駟馬橋賦所謂題記數行寂寥千載者矣按李  
膺記云昇仙水起自始昌堰有兩叉中流即昇仙成都  
記云城北有昇仙山昇仙水出焉相傳三月三日張伯

子道成得上帝詔駕赤文於菟于此上昇也岑參昇仙  
橋詩長橋題柱去猶是未達時及乘駟馬車却從橋上  
歸名共東流水滔滔無盡期羅隱詩危梁枕路岐駐馬  
門前時價自友朋得名因婦女知直須論運命不得逞  
文詞執戟君鄉里榮華竟若為江遵詩漢朝卿相盡風  
雲司馬題橋衆又聞何事不如楊得意解搜賢哲薦明  
君元虞集歸蜀詩云我到成都住五日駟馬橋下春水  
生過江相送荷子意還鄉不留非我情鷓鴣輕篴下溪

足鸚鵡小窻呼客名賴得郛筒酒易醉夜深衝雨漢州  
城 益州記云昇仙亭夾路有二臺一名望鄉臺在縣  
北九里成都記曰望鄉臺蜀王秀所作杜甫詩神交作  
賦客力盡望鄉臺蓋指此也昇仙橋北長林蒼翠曲澗  
潺湲大非人世間境乃昭覺禪寺高僧傳云圓悟禪師  
宏振法席于此臨終書偈有萬緣遷變渾閒事五月山  
房冷似冰之句矣李旼昭覺寺紀略唐僖宗幸蜀放隨  
駕進士三榜題名記陳太師塑六祖像蕭相國構建寺

碑俱在寺內又有孫位張南本畫壁長安頌來昭覺寺  
額經亂而毀范鎮遊昭覺寺詩炎蒸無處避此地忽知  
寒松砌行無際石房禪自安鴛鴦秋沼漲蝙蝠晚庭寬  
登眺見田舍衡茅半不完陸游飯昭覺寺暮歸作云自  
墮黃塵每慨然携兒蕭散亦前緣聊憑方外巾盂淨一  
洗人間七箸羶靜院春風傳浴鼓畫廊晚雨濕茶煙潛  
光寮裏明窻下借我逍遙過十年 方輿勝覽萬歲池  
在府北十里華陽國志張儀築城取土處去城十里因

以養魚謂之萬歲池郡國志云龍壇在萬歲池唐開元  
中有僧誦法華經感老叟來聽僧問之曰我池中龍也  
僧曰今方旱何不降雨叟曰凡雨須天符不爾天誅之  
今當為師降雨師其葬我是夕大雨質明見池邊大蛇  
斬而雨僧取焚之為立塔呼龍壇錄異記云成都至真  
觀道士黎元興龍朔中於學射山創造觀宇夜夢神人  
引昇高山大殿之中謁見黃老君身長數丈髭鬚皎白  
戴鳳冠著雲霞衣侍衛十餘人顧謂元興曰吾近有材

木可構此觀無煩憂也如此數日有人於萬歲池中乘舟取魚忽見水色清澈池底大木極多以告元興元興令人取之得烏楊木千餘段至有長百尺者用以起觀作黃老君殿依夢像塑之又制三尊殿下及講堂齋壇房廊門宇皆足用焉盧照隣集云至真觀者隋開皇二年所立有天尊真人石像大小萬餘軀石壇三級週迴百步銅鐘一口重七十斤按至真觀後周所立觀側小蠻橋下掘得古碑云始青之下月與日雨半同升合為



一大如彈丸甘如蜜出彼玉堂入金石子若得之慎勿失此度世古玄歌也隋辛德源記略云前臨逸陌却負長瀛蕙樓接登景之房瓊臺帶蕩真之室矣今此觀尚存通志云成都萬歲池廣袤十里溉三鄉田歲久淤澱王剛中知府日集三鄉夫共疏之累土為防上植榆柳表以石柱州人指曰王公之甘棠也歲華紀麗稱三月三日張伯子于學射山上升巫覡賣符于道遊者佩之以宜蠶辟災太守出遊日晚宴于萬歲池唐司空曙

晦日益州北池陪宴詩云臨泛從公日仙舟翠幕張七  
橋通碧水雙樹接花塘玉燭收寒氣金波隱夕光野間  
歌管思水靜綺羅香遊騎縈林遠飛橈截岸長郊原懷  
灞漣陂澹寫江黃常侍傳花詔偏裨伺羽觴宣令南峴  
首千載播餘芳宋范成大上巳日萬歲池坐上呈提刑  
程詠之云降春酒暖絳煙霏漲水天平雪浪遲綠岸翻  
鷗如北渚紅塵躍馬似西池麥苗剪剪嘗新麪梅子雙  
雙帶折枝試比長安水邊景祗無饑客為題詩 寰宇

記云學射山一名斛石山在縣北十五里李膺益州記  
斛石山有兩女冢矣田況三月三日登學射山詩麗日  
照芳春良會重元巳陽濱脩祓除華林程射技所尚或  
不同茲俗亦足喜門外盛車徒山半列鄜市彩棚飛鏑  
遠醉席歌聲起回頭望城郭煙靄相表裏秀色滿郊原  
遙景落川渌目倦意猶遠思餘情未巳登高貴能賦感  
物暢幽旨宜哉賢大夫由斯見材美趙抃次蘇軾游學  
射山詩錦川風俗喜時平上巳家家出郡城射圃人稠

喧畫鼓龍湫波淨照紅旌迎真昔詫登天虎命侶今聞  
出谷鶯勉為遠民同樂事使臺仍是得賢明楊甲寒食  
遊學射山詩疾風吹沙天茫茫日落未落原野黃山空  
無人不碌碌路長馬饑石齧足荒臺古林翳雲族何人  
剗茁縛層屋當時萬騎填山谷至今拾寶多遺鏃故國  
山川愁遠目人世悲歡風雨速凌高舉酒天為感手扳  
巖岫扣雲木何人唱我淒涼曲興亡一眼冥冥綠野水  
平蕪飛鴈驚范鎮有仲遠龍圖見邀遊學射詩幾年魂

夢寄西州春晚歸逢學射遊十里香風塵不動半山晴  
日雨初收指麾武弁呈飛騎次第紅粧數勝籌夾道綺  
羅瞻望處管絃旒旆擁遨頭自註云故事往來皆呈馬  
騎設射棚衆賓皆射遣官妓記籌按學射山者以劉主  
禪于此學射故名蜀檣机云王衍乾德二年秋北巡后  
妃出餞於昇仙橋于時旌旗戈甲百里不絕判六軍諸  
衛事者宰相王鎔也後主戎裝披金甲珠帽錦袖執弓  
挾矢百姓望之謂如灌口神馬是從來講武備于斯矣

今為蜀府墳墓此遊遂絕 志云府北三十里有天回

山揚雄蜀記以杜宇自天而降號曰天墮及元宗幸蜀  
返蹕之後土人呼曰天回今謂之天回鎮也 寰宇記

云玉局壇在城北柳堤玉局觀內按今往新繁路自堤  
上行十二里有賽雲臺足以當之其側仍有一小觀存  
方輿勝覽道經二十四化上應二十四氣六十甲子分  
隸之玉局化其一也彭乘玉局記云後漢永壽元年李  
老君與張道陵至此有局脚玉床自地而出老君昇座

為道陵說南北斗經既去而座隱地中因成洞穴故以玉局名之雲笈七籤成都玉局化洞門石室昔老君降現之時玉座局脚從地而湧老君昇座傳道既去之後座隱地中陷而成穴遂為深洞與青城第五洞天相連天師以為玉局上應鬼宿恐開穴通氣不利分野乃刻石以閉之因為石室高六七尺廣一步中鏤玄元之像焉節度使長史章仇兼瓊開元中徧修觀宇崇顯靈迹欲開洞門使人究其深淺發掘之際晴景雷震大風拔

木因不敢犯按續博物志玉局觀洞高駢帥蜀時取罪人以繩絆其腰令探淺深繩兩月方絕出青城山洞天觀門矣靈驗記云天寶歲玉局觀前江內往往夜中有光從水而出高七八尺上赤下白其末如煙明皇幸蜀有人於光處得玉像老君以進高餘一尺天姿瑩潔寶相圓明殆非人工所製駕回留鎮太清宮今聖容埧是其處也亦名玉女埧與金沙泉古跡連接矣宋史祥符七年六月十八日申時玉局化老君洞中忽有五色光



出見高三尺以來移時方散太守凌策畫圖具表以聞  
趙抃贈玉局李垂應太師詩云坐觀山水地幽清恬淡  
冲虛樂性情跡混光塵宗老氏術通仙俗似君平欣逢  
真侶論根本耻向權門叩利名濟世金丹得傳授先生  
高隱在青城司馬光送羅郎中登管勾玉局觀詩官名  
為玉局已與俗塵疎鐘出寒松迥香凝古殿虛鄉閭非  
甚遠俸祿豈無餘誰道神仙樂神仙恐不如范鎮送羅  
勝卿同年提舉玉局觀詩匹馬西歸去知君得意偏人

情重鄉里官職更神仙曉後無衙喏旬頭有俸錢何須  
駕白鶴辛苦上青天宋京補亡詩云君不見青陽老人  
飛下天口宣至道朝羣仙地中神仙捧玉局異事祕恠  
于今傳龜城坤隅地有穴俗說西與岷山連嵯峨古觀  
森偉像老栢慘澹含風煙令威已去城郭在人物自改  
名依然亳州宮庭煥星斗真皇行幸祥符年所託得地  
近京邑此獨隱晦遐方偏安得老人洗此心還我澹泊  
同古先蘇軾送戴蒙赴成都玉局觀詩拾遺被酒行歌

處野梅官柳西郊路聞道華陽版籍中至今尚有城南  
杜我欲歸尋萬里橋水花風葉暮蕭蕭茅魁徑尺誰能  
盡檀木三年已足燒百歲風光定何有羨君今作戎眉  
叟縱未家生執戟郎也應世出埋輪守莫欺老病未歸  
身玉局他年第幾人會待子猷清興發還須雪夜去尋  
君按子瞻自昌化軍貶所移廉州又移舒州乃敕提舉  
成都玉局觀他年老焉之讖竟驗然有謝表未赴

蜀中廣記卷三

欽定四庫全書

蜀中廣記卷四

明 曹學佺 撰

名勝記第四

川西道

成都府四

張詠創設記云按圖經秦惠王遣張儀陳軫伐蜀滅開  
明氏卜築蜀郡城方廣十里從周制也分築南北二少

城以處商賈少城之跡今并湮沒隋大封子秀為蜀王因附張儀舊城增築南西二隅通廣十里今之官署即蜀王秀所築之城東北也方輿勝覽云隋蜀王秀取土築廣子城因為池有胡僧見之曰摩訶宮毗羅蓋梵語呼摩訶為大宮毗羅為龍謂此池廣大有龍耳又云摩訶池一名汙池陳人蕭摩訶所開也蜀檇杌王建武成元年改摩訶池為龍躍池王氏開國記云建將薨前兩月摩訶池有鷄鵠來集衍即位仍改龍躍池為宣華池

渭南集云摩訶池入王蜀宮中舊時泛舟入此池曲折  
十餘里至宋世蜀宮後門已為平陸然猶呼為水門也  
按今此池填為蜀藩正殿西南尚有一曲水光連漪隔  
岸林木蓊翳遊者寄古思焉唐杜甫晚秋陪嚴鄭公摩  
訶池泛舟得溪字詩云端駛風醒酒船迴霧起隄高城  
秋自落雜樹晚相迷坐觸鴛鴦起巢傾翡翠低莫教驚  
白鷺為伴宿青溪暢甫偶宴摩訶池詩云珍木鬱清池  
風荷左右披淺鴈寧及醉慢舸不知移蔭簾林光冷照

流簪影歆胡為獨羈者雪涕向漣漪薛濤摩訶池懷蕭  
中丞詩昔以多能佐碧油今朝同泛舊仙舟淒涼逝水  
頽波遠惟有碑前咽不流高駢殘春遣興云畫舸輕桡  
柳色新摩訶池上醉青春不辭不為青春醉只恐鶯花  
也恠人孟昶避暑摩訶池玉樓春詞冰肌玉骨清無汗  
水殿風來暗香滿簾開明月獨窺人欹枕釵橫雲鬢亂  
起來瓊戶啟無聲時見疎星渡河漢屈指西風幾時來  
只恐流年暗中換宋祁過摩訶池詩十頃隋家舊鑿池

池平樹盡但迴隄清塵滿道君知否半是當年濁水泥  
又池邊不見帛闌船麥隴連雲樹繞天百歲興衰已如  
此爭教東海不為田陸游摩訶池詩摩訶古池苑一過  
一消魂春水生新漲煙蕪沒舊痕年光走車轂人事轉  
萍根猶有宮梁燕銜泥入水門 天寶逸事云明皇幸

南京多以宮人自隨乃令成都畫手畫為十眉以賜之  
一曰鴛鴦眉又名八字眉二曰小山眉又名遠山眉三  
曰五岳眉四曰三峯眉五曰垂珠眉六曰月稜眉七曰



分梢眉八曰玉烟眉九曰排雲眉又名橫烟眉十曰倒  
暈眉也李白上皇西巡南京歌云胡塵輕拂建章臺聖  
主西巡蜀道來劒壁門高五千仞石為樓閣九天開其  
二九天開出一成都萬戶千門入畫圖草樹雲山如錦  
繡秦川得及此間無其三德陽春樹似新豐行入成都  
若舊宮柳色未饒秦地綠花光不減上陽紅其四誰道  
君王行路難六龍西幸萬人歡地轉錦江成渭水天迴  
玉壘作長安其五萬國同風共一時錦江何謝曲江池

石鏡更明天上月後宮親得照蛾眉其六濯錦清江萬  
里流雲帆龍舸下揚州北地雖誇上林苑南京還有散  
花樓其七錦水東流繞錦城星橋北挂象天星四海此  
中朝聖主峨眉山上列仙庭其八秦開蜀道置金牛漢  
水元通星漢流天子一行遺聖跡錦城長作帝王州其  
九水綠天青不起塵風光和暖勝三秦萬國煙花隨玉  
輦西來添作錦江春其十劔閣重關蜀北門上皇歸馬  
若雲屯少帝長安開紫極雙懸日月照乾坤 古今集

記云王建初克蜀造有紅樓綵繪華侈初潁川人華洪隨之入蜀賜姓王與諸子連名曰宗至是造紅樓建以為應華洪之讖乃誅之王氏開國記云乾德四年秋紅樓肥遺見後蜀辛寅遜曰肥遺旱魃也張唐英引山經外傳肥遺有角蛇角上有火見則大旱非魃鬼也按魃鬼曰生頂上矣 檇杭云王衍即位之日即治宣華苑乾德三年苑成延袤十里有重光太清延昌會真之殿清和迎仙之宮降真蓬萊丹霞之亭土木之功窮極奢

巧衍數於其中為長夜之飲嬪御襍坐舄履交錯焉衍  
宴宣華苑宮詞云輝輝赫赫浮五雲宣華池上月華新  
月華如水浸宮殿有酒不醉真癡人乃命宮人李玉簫  
歌之勸王宗壽酒也成都文類云李珣梓州人其妹為  
蜀王衍昭儀有詞藻即所稱李舜絃夫人矣洪邁絕句  
載舜弘蜀宮應制詩濃樹禁花開後庭飲筵中散酒微  
醒濛濛雨草瑤階濕鐘曉愁吟獨倚屏又釣魚不得詩  
云盡日池邊釣錦鱗菱荷香裏暗消魂依稀縱有尋香

餌知是金鈎不肯吞又隨駕游青城詩云因隨八馬上  
仙山頓隔埃塵物象閒只恐西追王母宴却憂難得到  
人間此與徐太后太妃同作者后妃作詳見詩話中絕  
句又載羣仙降蜀宮六首其一后土夫人云偶引羣仙  
到世間薰風殿裏醉華筵等閒貪賞不歸去愁殺韋郎  
一覺眠其二王母云滄海成塵幾萬秋碧桃花發長春  
愁不來便是數千載周穆漢皇何處遊其三麻姑云世  
間何事不潛然得失人情命不延適向蔡京廳上飲回

頭已是一千年其四上元夫人云思量往事一愁客阿  
母曾邀到漢宮城闕不存人不見茂林荒草恨無窮其  
五弄玉云彩鳳飛來到禁闈便隨王母駐瑤池如今記  
得秦樓上偷見蕭郎惱妾時其六太真云春夢悠揚生  
下界一堪成笑一堪悲馬嵬不是無情地自遇蓬萊睡  
覺時蓋亦附會杜光庭王氏男女仙傳而然矣 蜀檮  
杌初王氏宮殿皆題匠人孟得姓名及知祥入蜀居之  
人以為先兆云長興五年正月白龜遊宣華苑苑即王

氏所建孟氏呼為仙花苑蓋音之訛或指仙人所進旌  
節花而名也明年七夕知祥宴丹霞樓觀宮人乞巧因  
寢疾而終孟昶廣政三年上元觀燈于露臺舞娼李艷  
娘有姿容召入宮賜其家錢十萬六年春衍大選良家  
子以備後宮限年十五以上二十以下於是後宮有昭  
儀昭容昭華保芳保香保衣安宸安蹕安情修容修媛  
修娟十四號秩比公卿大夫士焉花藥夫人者本青城  
費氏女以才色嬖于後宮吳曾漫錄以為徐匡璋所納

女拜貴妃別號花藥夫人以其色似花藥艷輕也又陞  
號慧妃喻其性也夫人嘗效王建作宮詞百首其一云  
五雲樓閣鳳城間花木長新日月閒三十六宮連內苑  
太平天子住崑山其二會真廣殿約宮牆樓閣相扶倚  
太陽淨甃玉堦橫水岸御爐香氣撲龍牀其三龍池九  
曲遠相通楊柳牽絲兩岸風長似江南好風景畫船來  
往碧波中其四東內斜將紫氣通龍池鳳苑夾城中曉  
鐘聲斷嚴粧罷院院紗窻海日紅其五殿庭新立號重



光島嶼亭臺盡改張但是一人行從處黃金閣子鎖牙  
牀其六安排諸院接行廊水檻周迴十里強青錦地衣  
紅線毯盡鋪蘭麝鬱金香其七夾城門與內門通朝罷  
巡遊到苑中每日日高祇候處滿隄紅艷立春風其八  
厨船進食簇時新侍坐無非列近臣日午殿頭宣索鱠  
隔花催喚打魚人其九立春日進內園花紅藥輕輕漱  
淺霞跪到玉堦猶帶露一時分賜與宮娃其十三面宮  
城盡夾牆苑中池水白茫茫直從獅子門前入旋見亭

臺繞岸傍其十一離宮別院遶宮城金板輕敲合鳳笙  
夜夜月明花樹底傍池長有按歌聲其十二御製新翻  
曲子成六宮纔唱未知名盡將感箴來抄譜先按君王  
玉笛聲其十三旋移紅樹刷青苔宣使龍池更鑿開展  
得綠波寬似海水心樓殿勝蓬萊其十四修儀承寵住  
龍池掃地焚香日午時等候大家來院裏看教鸚鵡念  
新詩其十五六宮官職總新除宮女安排入畫圖二十  
四司分六局御前相見錯相呼其十六才人出入每參

隨筆硯相從遶曲池能向絲箋書大字忽防禦製寫新  
詩其十七春風一面曉粧成偷折花枝傍水行却被內  
監遙覩見故將紅豆打黃鶯其十八小毬場近曲城頭  
宣喚勲臣試打球先向畫廊排玉幄管絃聲動立浮油  
其十九梨園弟子簇池頭小樂携來候宴遊試炙銀笙  
先按拍海棠花下合梁州其二十殿前排宴賞花開宮  
女侵晨探幾回斜望苑門遙舉袖傳聲先喚近臣來其  
二十一供奉頭等不敢爭上前專喚近臣名內人酌酒

纔宣賜馬上齊呼萬歲聲其二十二殿前宮女總纖腰  
初學乘騎怯又嬌上得馬來纔似走幾回拋鞚抱鞍韉  
其二十三自教宮娥學打毬玉鞍初跨柳腰柔上棚知  
是官家認遍遍長贏第一籌其二十四翔鸞閣外夕陽  
天樹影花光遠接連望見內家來往處水門斜過罨樓  
船其二十五內人追逐採蓮時驚起鳬鷗兩岸飛蘭棹  
把來齊拍水並船相闕濕羅衣其二十六新秋女伴各  
相逢罨畫船飛別浦中旋折荷花伴歌舞夕陽斜照滿

衣紅其二十七少年相逐採蓮回羅帽羅衣巧製裁每  
到岸頭長拍水競提纖手出船來其二十八早春楊柳  
引長條倚岸緣牆一面高稱與畫船牽錦纜暖風搓出  
絲絲條其二十九婕妤生長帝王家常近龍顏逐翠華  
楊柳岸長春日暮傍池行困倚桃花其三十月頭支給  
買花錢滿殿宮人近數千遇着唱名多不語含羞急過  
御床前其三十一太虛高閣淩波殿背倚宮牆面枕池  
諸院各分娘子位羊車到處不教知其三十二寒食清

明小殿傍綵樓雙夾闌雞場內人對御分明看先睹紅  
羅滿擔床其三十三水車踏水上宮城寢殿簷頭滴滴  
鳴助得聖人高枕興夜深長作遠灘聲其三十四平頭  
船子小龍床多少神仙立御傍旋刺篙竿令過岸滿池  
春水蘸紅粧其三十五苑東天子愛巡遊柳岸花堤枕  
碧流新教內人工射鴨長將弓箭遶池頭其三十六羅  
衫玉帶最風流斜插銀篋慢裹頭聞向殿前騎御馬掉  
鞭橫過小紅樓其三十七沉香亭子傍池斜夏日巡遊

歇翠華簾畔越盆盛淨水內人手裏割銀瓜其三十八  
薄羅衫子透肌膚夏日初長板閣虛獨自憑欄無一事  
水風涼處讀文書其三十九金畫香臺出露盤黃龍雕  
刻遶朱欄焚修每遇三元日天子親簪白玉冠其四十  
六宮一例羅冠子新樣交鐫白玉花欲試淡妝兼道服  
面前宣與唾盂家其四十一二月櫻桃乍熟時內人相  
引看紅梔回頭索取黃金彈遶樹藏身打雀兒其四十  
二小小宮娥到內園未梳雲鬢臉如蓮自從配與夫人

後不使尋花亂入船其四十三錦城上起凝煙閣擁殿  
遮樓一向高認得聖人遙望見碧闌干映赭黃袍其四  
十四大臣承寵賜新莊梔子園東柳岸傍每日聖恩親  
幸到板橋頭是讀書堂其四十五舞頭皆着畫羅衣唱  
得新翻御製詞每日內庭聞教隊樂聲飛出躍龍池其  
四十六春早尋花入內園競傳宣旨欲黃昏明朝隨駕  
遊蠶市暗使羶車就苑門其四十七半夜船遊載內家  
水門紅蠟一行斜聖人止在宮中飲宣使池頭旋折花



其四十八春日龍池小宴開岸邊亭子號流杯沉檀刻  
作神仙女對捧金尊水上來其四十九慢梳鬟髻著輕  
紅春早爭求芍藥叢近日承恩移住處夾城裏面占新  
宮其五十別色宮司御輦家黃衫束帶臉如花深宮內  
苑承恩慣常從金輿到日斜其五十一日高房裏學圍  
碁等候官家未出時為賭金錢爭路數專憂女伴恠來  
遲其五十二擣蒲冷淡學投壺箭倚腰身約畫圖盡對  
君王稱妙手一人來謝一人輸其五十三慢揎羅袖指

纖纖學釣池魚傍水簾忍冷不禁還自去釣竿長被別人拈其五十四宣徽院約池南畔粉壁紅妝畫不成總是一人行幸處徹長聞奏管絃聲其五十五丹霞亭浸池心冷曲沼門含水脚清傍岸鴛鴦皆有對時時出向淺沙行其五十六楊柳陰中引御溝碧梧桐樹擁朱樓金陵城共滕王閣畫向丹青也合羞其五十七晚來隨駕上城遊行到東西百尺樓回望苑中花柳色綠陰紅艷滿池頭其五十八牡丹移向苑中栽盡是藩方進入

來未到末春綠地暖數般顏色一時開其五十九明朝  
臘日官家出隨駕先須點內人回鶻衣裝回鶻馬就中  
偏稱小腰身其六十盤鳳鞍韉開色裝黃金腰胯紫游  
韁自從揀得真龍種別置東頭小馬坊其六十一翠輦  
每隨城畔出內人相次簇池隈嫩荷花裏搖船去一陣  
香風送水來其六十二高燒紅蠟點銀燈秋晚花池景  
色澄今夜聖人新殿宿後宮相近覓祇承其六十三苑  
中排比宴秋宵絃管爭擬各自調日晚閣門傳聖旨明

朝盡放紫宸朝其六十四夜深飲散月初斜無限宮嬪  
插亂花近侍嬈好先過水遙聞隔岸喚船家其六十五  
宮娥小小艷紅粧唱得歌聲遠畫梁綠是太妃新進入  
坐前頒賜小羅箱其六十六池心小樣釣魚船入翫徧  
宜向晚天掛得綵帆教便放急風吹過水門邊其六十  
七傍池居住有漁家收網搖船到淺沙預進活魚供日  
料滿筐跳躍白銀花其六十八秋晚紅粧傍水行競將  
衣袖撲蜻蜓回頭瞥見宮中喚幾度藏身入畫屏其六

十九御溝春水碧於天宮女尋花入內園汗濕紅粧行  
漸困岸頭相喚洗花鈿其七十昭儀侍宴足精神玉燭  
抽看記飲巡倚賴識書為錄事燈前時復錯瞞人其七  
十一後宮阿監裏羅巾出入經過苑囿頻承奉聖顏憂  
誤失就中常怕內夫人其七十二管絃聲急滿龍池宮  
女藏鈎夜宴時好是聖人親捉得便將濃墨掃雙眉其  
七十三密室紅泥地火爐內人冬日晚相呼今宵駕幸  
池頭宿排比椒房得暖無其七十四三清臺近苑牆東

樓檻層層映水紅盡日綺羅人度曲管絃聲在半天中  
其七十五高亭百尺立春風引得君王到此中床上翠  
屏開六扇折枝花綻牡丹紅其七十六內人承寵賜新  
房紅紙泥窻遠畫廊種得海柑才結子乞求自過與君  
王其七十七翡翠簾前日影斜御溝春水浸成霞侍臣  
向晚隨天步共看池頭滿樹花其七十八金碧闌干倚  
岸邊卷簾初聽一聲蟬殿頭日午搖紈扇宮女爭來玉  
座前其七十九嫩荷香撲釣魚亭水面文魚作隊行宮

女競來池畔立倚簾呼喚勿高聲其八十新翻酒令著  
詞章待宴初聞意却忙宣使近臣傳賜本總教諸院遍  
抄將其八十一畫船花舫總新粧進入池心近島傍松  
栢鏤窻楠木板暖風吹過四圍香其八十二西毬場裏  
打毬回御宴先從苑內開宣索教坊諸伎樂傍池催喚  
入船來其八十三年初十五最風流新賜雲鬟使上頭  
按罷霓裳歸院裏畫樓雲閣總重修其八十四春來睡  
起曉粧成隨侍君王觸處行畫得自家梳洗樣相憑女

伴把來呈其八十五寢殿門前曉色開紅梳藥樹間花  
栽君王未起珠簾卷宮女更番上直來其八十六海棠  
花發盛春天遊賞無時列御筵遶岸結成紅錦帳暖枝  
低拂畫樓船其八十七日晚宮人外按回自牽驄馬出  
城隈御前接得高叉手射得山鷄喜進來其八十八朱  
雀門高苑外開毬場空濶淨塵埃預排白兔兼蒼狗等  
候君王按鵲來其八十九會仙觀裏玉清壇新點宮人  
作女冠每度駕來羞不出羽衣初著怕人看其九十老



大初教作道人鹿皮冠子淡黃裙後宮歌舞全拋擲每  
日焚香事老君其九十一法雲寺裏中元節又是官家  
降誕辰滿殿香花爭供養內園先占得鋪陳其九十二  
酒庫新修近水傍潑醅初熟五雲漿殿前供御頻宣索  
進入花間一陣香其九十三白藤籠稻白銀花閣子門  
前寢殿斜近被宮中知了事每來隨駕使煎茶其九十  
四金章紫綬選高班每每東頭近聖顏材藝足當恩寵  
別只堪供奉一場間其九十五安排竹柵與芭籬養得

新生鶻鵒兒宣受內家教餵飼花毛間著總皆知其九  
十六內人深夜學迷藏遍遶花叢水岸傍乘興忽來山  
洞裏大家尋覓一時忙其九十七小院珠簾著地垂院  
中排比不能知羨他鸚鵡能言語窻裏偷教鸚鵡兒其  
九十八島樹花低約浪痕苑中斜日已黃昏樹頭未刻  
雙飛鸛颺起晴空映水門其九十九小雨霏微潤綠苔  
石楠紅杏傍池開一枝插向金餅裏捧進君王玉殿來  
其一百錦鱗躍水出浮萍荇草牽風翠帶橫恰似金梭

碧沼好題幽恨寫閨情劉希夷蜀城懷古詩云蜀土  
能水竹吳天積風霜窮覽通表裏氣色何蒼蒼舊國有  
三代青樓思豔粧古人無歲月白骨宜丘荒寂歷彈琴  
地幽流讀書堂玄龜埋卜室采鳳滅詞場陣圖一一在  
樹雙雙行鬼神清漢廟烏雀參秦倉歎世已多感懷  
益自傷賴蒙靈邱境時當明月光宋祁覽蜀宮故城  
有作云國破江山老人亡岸谷推駕飛今日瓦鹿聚向  
時臺故苑猶霏雪荒池但劫灰賴遺糊處壤闌記數殘

枚恨月窺林下悲風寬隴來依城狐獨速失厦燕徘徊  
廢社纔存樹陰垣自上苔有情惟杜宇長為故王哀

唐盧求成都記序略云蜀郡太守自秦惠王滅蜀始而  
李冰文翁其最著者益州刺史自漢武帝開疆始而王  
遵王襄其最著者始時寔一官也而興廢異焉劉先主  
于益州置牧蜀郡置守而官始分矣晉太康以刺史治  
太城郡守治少城而地亦分矣改益州為劍南節度使  
自唐天后始改蜀郡為成都尹自明皇西巡始其後州

郡亦得相兼焉宋知成都府事者往往以密直使相稱  
簡貴尊重淳化初雖降為州而體自若乃中興小厯所  
載則以蜀有都轉運使遂罷制置之設而張燾且得以  
成都行四川民事矣其公署邸閣留題碑記間者班班  
可考焉 轉運署舊有燕思堂堂上爽西樓趙清獻再  
入蜀所建文同與可記之於前李石知幾記之于後矣  
轉運司園亦稱西園園中有西樓有錦亭一名翠錦  
亭章綵詩序云轉運西園是偽蜀權臣故宅爽塏清曠

隨處足樂于是作為十詠羣公咸和之備錄以志其盛  
云爾西園詩云古木鬱參天蒼苔下封路幽花無時歇  
醜石終朝踞水竹散清潤煙雲變晨暮何必憶山林直  
有山林趣玉溪堂詩云堂因水得名方沼當其後漪瀾  
蕩棖桷窗戶挹花柳蟲魚不避人鷗鷺若相友午枕夏  
簟涼此樂亦奚有雪峯樓詩云層構壓池塘不僭亦不  
偏影浮江水靜寒逗雪山色撫檻接修竹連簷引蒼栢  
注目望長安無那濃雲隔海棠軒詩云珍葩寄幽島正

對孤山植優游自俯仰紅綠若組織春酣晴日熏坐久  
濃香逼池面淨可鑒朝霞罩澄碧月臺詩云蜀地饒夜  
雨輕陰多蔽天見月月無幾築臺待嬋娟高凝桂影近  
俯視雲屋連顧盼已塵外欲挹瑤宮仙翠錦亭詩云梗  
楠百尺餘排列拱簷際畏日自成陰隆冬寧減翠虛曠  
得寂理懶癖資濃睡誰知官府中獲此冲漠味潺玉亭  
詩云傍砌醺小渠迴環是流水石蜃吐珠涎清響醒人  
耳風微竹影碎月皎波光起颯爽無鹿竄靜適心所喜

茅菴詩云竹間構圓菴所向自蕭灑珍禽弄巧舌宛是  
居山野嘿坐見真心萬緣盡虛假叨陋尋尺地茲焉息  
意馬水閣詩云架木浮水中略約通孤島扶疎花影斜  
撥刺跳魚小風月所得多經營信云巧隱几寂無人朱  
欄萃幽鳥小亭詩云花邊二小亭雙跨清渠上規摹雖  
甚隘幽僻良可賞幸依嘉木陰未羨大廈廣不足延賞  
朋携筇常獨往吳師孟和云十紀權臣第修城外臺宅  
喬木不知秋名花數逾百遠如山林幽近與塵埃隔惠



政裕一方民猶以為窄又華構枕方塘使臺寂佳致二  
色真楠材輪奐極精緻花木四面圍如立復如侍一道  
仰澄清此是澄清地又西北有高樓梁棟雲常起簷牙  
挂連蜷欄影搖清泚爽氣雪山來一瞬極千里但欲攄  
遠懷無憂可銷弭又花溱對高軒如用丹青影錦水一  
匳紅玉臺千面笑松篁雨翠幄常護東西照字細看韶  
妍方知化工妙又雅意待蟾光煩襟期爽快無雲點太  
清遠覽周色界天宇淨琉璃露下真沆瀣勤渠諗後人

宜葺不宜壞又東閣治臺政西堂備燕飲介于二堂間  
華構饒花品紅紫鎮長春四時如活錦公暇一繩床上  
有通中枕又至人泉石心俚耳便絲竹醺渠逗清冷朝  
夕淙寒玉試聽自然聲不減雲璈曲却返倒聞機五音  
常自足又結茅為圓屋環堵不開牖齋居如雁堂廣長  
纔六肘深藏子猷竹不植陶潛柳勿起減定心宴坐空  
諸有又形制似方橋島岸相連屬春和逗涼颺晝影浮  
淨綠佳人羅襪輕花時相步續澄瀾忽生暈下有雙鳬

浴又尺水走庭除花木皆周匝雙亭正相值僅能容一  
榻公餘時獨來隱几聊噓詎典謁或通名東榮有賓閣  
許將和云高牙負北郭芳園路西轉鳥鳴戀故木蘭茁  
歸新晚坐延花景深行倚筇杖穩翳然想林水會心不  
在遠又朱堂俯玉谿玉谿清且幽從公暫息偃撫景空  
夷猶浮雲冠圓島白日回方流祗此有光碧何必崑崙  
洲又重樓起城陰乘高望西極列峯橫青天飛雪千里  
積疑是空素山冬夏海中白莫恠頻東向上有思歸客

又海棠冠蜀花此軒花尤冠紅雲簇藥細綠水照葉嫩  
倚粧宮粉聚疊綺霞光散雨淚點春風應懷上林怨又  
蜀地山四維益州平如掌累臺鬱臨風坐看月宵上稍  
出叢木末始發衆籟爽茲焉暫遊目一攬天地廣又闌  
干竇溜長霹靂空埃靜修林密蔥翠盡得錦城錦雲舒  
青青色風散搔搔影未為夜行人共此晝遊永又引泉注  
清渠潺潺漱寒玉側出闌風遲驟驚江雨連飛瀨乍颺白  
樛木細涵綠晝夜流不止肯效楚人哭又茨茆以為菴

環堵蕭然虛內樂苟自足容膝亦有餘旁依修竹密上  
翳青松疎勿言此中陋中有君子居又飛閣出方池修  
曲見空莽旁臨花塢近平覺春波長反景澄餘暉夕陰  
帶浮爽從容觀魚樂不減遊濠上又翩然溝上亭左右  
相映帶修柵列翠幄長松偃高蓋地褊景逾寬處約志  
彌泰誰知坐嘯間心遊萬物外豐稷和云仙化二十四  
境遠難遍探錦城使君園雅興雲洞參回光試一覽紫  
翠絕西南池映金波淨花沾玉露甘又一水從何來應

是崑山頂醜成綠玉池虛堂逗清影公退泠然賞了非  
心外境魚泳陽光動鳥啼春晝永又雪峯在何許樓倚  
青霄端每來注心目不覺生羽翰終藉好風力雲散銀  
闕攢隻履西歸客應笑空倚欄又文錦初動機晨霞欲  
敷照香傳雪樓濃影落玉溪倒子美不能賦春工一何  
妙惟有賞心人相逢祇微笑又石印魚在屏屏透星入  
角迺知明月光日用人不覺陟此百尺臺餘念坐消剥  
洞曉弦望機仙丹茲可學又簷外列修木凜凜正人氣

欽定四庫全書

卷四

有德必有文爛兮五色備豈同天韶花弄春張繡被須  
信輪囷材堪為萬乘器又養源在西山如玉挹精白引  
之落錦渠歷耳不可擇風雨雜鳴球珠璣瀉雲液恰似  
偃谿聲醒悟迷途客又覆以潔白茅環以琅玕竹天籟  
傍鼓笙月沼對鋪玉借問清坐翁此外更何欲笑指博  
山鑪香飛栢子綠又長虹臥松江一葦航大河豈如此  
安穩無復畏風波幽香翠花島魚藻音且多徙倚小欄  
曲月色透薜蘿又東西對孤騫杖屨可休歇容光日月

來矧此明四徹鱗木張幄翠蜃樓飛玉潔往往得意時  
宛在廣寒闕楊怡和云池臺密相望曾是故侯宅賞心  
知幾人喬木已百尺低花拂烏帽古蘚駁蒼石欲問昔  
豪華秋風掃無迹又虛堂已深窈那復要營室使君寂  
無事閉閣臥終日臨池狎清泚養竹聽蕭瑟不為省春  
耕輶車肯輕出又脩脩樓下竹瀌瀌竹間水樓高雖不  
見清響長在耳晨光露星崦積玉照窗紙崑閬亦何人  
當從跨金鯉又花如窈窕人宛在水中沚當軒有餘好



欽定四庫全書

卷四

終日玩芳蘼池清藻壓枝波動魚爭藻錦帳想含春歸  
心浩然起又嘉木密交陰月夕苦蒼翳高臺出林杪遠  
目望天際不厭清露寒祗恐輕雲蔽可但少陵翁能思  
斫仙桂又戔戔碧油幢矗矗羽葆蓋燕居不廢嚴環竦  
布亭外濃陰生晝寒微吹發天籟隱几對凝香衣冠嗒  
如蛻又使君漱流心官府未始忘亭下玉溪水撲碎白  
玉璫清耳不待洗高懷自滄浪安得援瑤琴寫此聲琅  
琅又緝茅如蝸廬容膝纔一丈規圓無四隅空廓含萬

象繩牀每宴坐不與物俯仰惟許歲寒君虛心環几杖  
又小閣平池陽危橋屬花輿杖屨樂幽閒龜魚蔭深阻  
刻柱記新漲弄水滌煩暑物我久相忘珍禽近人語又  
方亭惟四柱對峙花竹間下有雪嶺水淙流日潺潺宛  
如雙綵舸纜向春波灣欲起江湖心而柰風濤艱杜敏  
求和云潭潭刺史府宛在城市中誰知園亭勝似與山  
林同幽鳥語晴晝好花嬌春風物情如有待賦詠屬詩  
翁又堂前對花柳堂後瞰沼沚瞻有堂中人虛心湛如

水煩暑當風窗中宵隱月几作詩紀勝槩詩與水清泚  
又西山最高峯積雪連四季登樓試寓目八國有故地  
烽堠雖久息武經思豫備文饒昔籌邊公意今無媿又  
東風開百花獨有海棠勝猩血染珠璣點綴枝頭賸日  
暖錦段新雨餘燕脂凝何時東閣梅方能動詩興又月  
從海上來皎皎入我牖何如登高臺對月把尊酒問月  
月無言浩歌詩千首幾人知此樂此樂公所有又材大  
難為用嘗誇古栢篇亭前老榎楠黛色亦參天夏暑借

清陰秋籟得自然有如愛庭楸朝暮東西偏又林亭幽  
且深砌下玉谿水淙琤環佩聲曉夕清心耳使君性所  
樂愛玩不少已方持利物心默坐窮至理又深深竹林  
下圓菴最幽僻高懷本恬曠野趣助閒適衆人奔名徒  
浮世榮物役豈知菴中樂道勝心自逸又方池導流水  
橫閣上尋丈晨曦夜月光罩影相滉漾游魚時出沒飛  
鷗亦上下終朝倚欄干不見有風浪又二亭雖云小好  
在泉石間白石自齒齒清泉亦潺潺公府無留事暫來

寄餘閒筇杖烏角巾一日幾往還 宋李良臣東園記  
云益州路兵馬鈴轄种湘治其後圓為池亭臺榭植佳  
華莖美木館宇星陳欄檻翼翼舊有池焉泉竇湮塞涸  
為枯泥偶新泉破地而出從而導之則故泉繼發熾沸  
衍溢种公築堂其北命之曰雙泉挾以二軒一曰錦屏  
以海棠名一曰武陵以桃溪名梁池而南為亭曰寒香  
以梅名後為茅亭曰幽芳以蘭蕙名池東為大亭曰三  
雨以桃杏梨名池曰雨亭東西對峙曰綠淨曰連碧雙

亭之北有老栢數十株巨幹屹立為亭其中曰翠陰復樓其東曰朝爽西因垣而山曰五峯下曰五峯洞前為山館水繞環之宛如山間文同丹淵集云成都鈴轄東園有梅樹樹下有素芳亭慶厯中四方館使太原王公府尹程公賦詩刻石存焉後二十年太原之子道恭及趙閱道又飲于亭上賞梅賦詩俾與可序之詩詳見方物記中 張詠勅設記曰王建孟知祥迭稱偽號乾德初王師弔伐申命叅知政事呂餘慶知軍府事取偽冊

勲府為治所淳化甲午降府為州至道丁酉歲詠始議  
改作東因孟氏文明廳為設廳廊有兩樓中門立戟因  
王氏西樓為後樓樓前有堂堂有掖室室前迴廊南為  
暖廳廳屏有黃荃畫雙鶴花竹怪石在焉名曰雙鶴廳  
次南為涼廳廳壁有黃氏畫湖灘山水雙鷺在焉名曰  
畫廳涼暖二廳便寒暑也涼廳西有都廳廳在使院六  
十間之中所以便議公也院北有節堂堂北有正堂與  
後樓前為次西位也節堂西通兵甲庫所以示積藏也

涼都二廳南列四署同寮以居前門通衢後門通廳所  
以便行事也公庫直室客位食廳之列馬廐酒庫園菓  
疏流之次四面稱宜無不周盡疎篁奇樹香草名花所  
在有之不可殫記東挾戍兵一營南有軍資大庫改朝  
西門為衙西門去三門為一門凡得僭偽之迹屋大小  
七百四十間二營不在數 張俞府衙新書堂詩引云  
號略楊保臣由將作屬官隨侍于益府新闢書堂延儒  
者講文藝俞作新書堂詩以贈之云志士營道日築室



養賢名鋤荒出幽邃掃室迴虛明山嶽凌牆壁谿塘瀉  
窗楹蘭蘅露景晚松桂秋風生琴瑟閑古奏樽罍湛寒  
清默意馳萬象遊心覽八紘羣經互粲粲百氏紛營營  
禮樂立制作文章懸準程唐虞化已遠周禮道尚行師  
友得正士講論無俗聲邪哆不可入紛華固難傾修辭  
力工巧厲學逾農耕天爵既自後人文取其榮元侯方  
作鎮列士爭獻成學校溢都市謳吟洽黎氓寧同稷下  
議飽食談縱橫銅壺閣亦稱郡樓非崖公鎮蜀時通

夕宴坐郡樓上鼓鼗漏水厯厯分明一刻差誤必詰之  
守籤者服為神明公謂鼓角為中軍號令不可不謹爾  
京鐘帥成都首訪茲閣屹然自若銅壺漸失實矣因詢  
其漏法則寅申巳亥陟降其水者凡四既無所依據且  
其箭以七日半為等日升一刻必驟進之前卻頻數不  
無差忒知成都縣事臨邛宋朝英於是始更其法測午  
中之晷為升箭之初畢百刻而後易仍以厯象考七十  
二候初末昏明晝夜長短之數日異旬殊差布于箭乃

為亭其下圖刻漏製鏡諸石且名以惜陰建安吳棫記  
云府門稍東垂五十步慶歷四年知府事蔣公堂作漏  
閣以直午門以八分大字題額曰銅壺巋然南向一府  
之冠也崇寧初閣災政和元年棫承乏尹事始至府視  
閣故處累土如臺然問吏吏曰前尹蔣即臺為門治材  
略具朝廷亦嘗賜度牒售錢六百萬有奇尹去弗克成  
問錢與材今安在曰材為他所繕修輟用之錢則帑官  
車輒兌費矣棫曰午門者臺門也茲唯閣之宜奚臺之

有即日便撤累土圖閣如慶厯時通閣上一十有四  
間其高一丈六尺有五寸廣十丈深五丈有六尺審曲  
面勢丹堊是飾瓊覆甍甃厥有彛度中設關鍵闔闔惟  
謹閤成初置天聖中燕梓州肅所制蓮花漏於其下閣  
穴漏從閣十載更六尹於茲而閣成漏悉如燕製置一  
壺一衆一箭四十有八銅鳥逼水而下金蓮浮箭而上  
氣二十四候七十二百刻十二辰率是箭而定云 歲  
華紀覽天禧初趙禎為守三月三日開西樓亭榭俾士

三游堂自是每歲寒食闢園張樂酒爐花市茶房食肆  
過千尋市士女縱觀宋田况寒食開西園詩云春風寒  
食節成雨晝晴天日氣薰花色韶光徧錦川臨流飛鑿  
落岸樹立鞦韆檻外游人滿林間飲帳鮮衆音方雜還  
餘長吏留連座客無辭醉芳菲又一年宋祁衆熙亭曉  
賜詩云長夏宜高明緩帶散煩寤憑軒一超然目與天  
俱盡山從雲端現日就林外隱風來草樹披煙生井閭  
近自公況多暇冲臆無留蘊即此可宴居何須事遊軫

西樓詩云炎氛隨日入岑寂坐遙惟倦鶩昏投浦驚蟬  
夜去枝桂華兼月破槎影帶星移珍重靈風好義人即  
此時吳中復西園十詠詩序云成都西園樓榭亭池菴  
洞最勝者凡十所入於其間勝絕者西樓賞皓月眺岷  
山衆熙臨清池濯錦水志殊土之產有方物快蔭樾之  
風有竹洞雜花異卉四時遞開翠幹茂林蔽映軒戶足  
以會賓僚資燕息因題十詠以見登覽之盛也西樓詩  
云信美他鄉地登臨有故樓清風破大暑明月轉高秋

朝暮岷山秀東西錦水流賓朋逢好景把酒為遲留衆  
熙堂詩云亭枕方塘上軒開四照新花涵清露曉風卷  
綠波春日暖眠汀鷺荷翻躍錦鱗熙熙遊宴地行樂慰  
西人竹洞詩云陰森過百步屈曲鎖莓苔翠色寒無改  
清風時自來葉籠蒼玉幹路入碧雲堆吏散無公事支  
筇到幾回方物亭詩云草木蟲魚部披尋自古無飛沉  
天產異生植土風殊物色隨心匠形容記續圖虛亭玩  
真意浩思滿江湖翠栢亭詩云衆木墜黃葉皺皮抱翠

枝自然根性在不為雪霜移靈潤承多露清陰貫四時  
婆娑歲寒意每到坐遲遲圓通菴詩云對此圓通境陶  
然勝靜齋觀空無物我扣寂外形骸燕坐埋遺照虛名  
莫疚懷人問憂樂地所喪甚山崖琴壇詩云瀟灑琴壇  
上賢侯養道情無今亦無古求意不求聲林逋風初靜  
雲收月乍明拂弦成一弄塵思浩然清流杯亭詩云結  
客乘公暇流觴逐浩歌亂峯晴倒影曲水宛迴波小海  
逢元已蘭亭記永和西州行樂事應比晉賢多喬柟亭




欽定四庫全書

卷四

詩云木占西園勝亭延上客過色無花卉妬堅為雪霜  
多幹有千年秀根含一氣和明堂求厚棟可得老巖阿  
錦亭詩云簾幕臨雕檻窗疎照爛霞園林初過雨風日  
猛催花香入遊人袖紅堆刺史家四時俱好景終不似  
春華 唐書李德裕建籌邊樓于成都府治之西四壁  
圖蠻夷險要日與習邊事者籌畫其上女校書薛濤上  
籌邊樓詩云平臨雲鳥入窗秋壯壓西川四十州諸將  
莫貪羌族馬最高層處見邊頭宋陸游曰籌邊樓故基

莫攷淳熙三年制置使知府范公成大重建卜地在子  
城西南隅樓既成公自作水調歌頭云萬里籌邊處形  
勝壓坤維恍然舊觀重見鴛瓦拂參旗夜夜東山銜月  
日日西山橫雪白羽弄空暉人語半霄碧驚倒路傍兒分  
弓了看劍罷倚欄時蒼茫平楚無際千古鏢煙霏野曠  
岷嶓江動天闊嶺函雲擁太白暝中低老矣漢都護却  
望玉關歸按今籌邊樓在都院之東掖隨使節而遷者  
李燾云華陽縣主簿廳有會昌中壁記乾符中柱刻

會昌迄今三百年成都千門萬戶時遭焚裂求往日之  
破甃斷檻殆尺寸莫獲而此廳事獨存圻墁朱墨不改  
其舊是豈偶然耶為之記而刻諸梁上



蜀中廣記卷四